

Bàu Lem tiaq
Jon
Achih Bìac Chuaq Jêxu Broq wa Hnài
Bàu Patô Adroi

Hiniq wa Bàu Xèm Da Sech:
Hiniq sech cô: Jon.

Mangai Achih wa Hanam Achih:
Jon mangai achih sech cô. Adroi nèh haq mangai hõc tiaq Chuaq Jêxu. Haq achih tiaq bàu ta Sech Bìac Baxèm. Haq achih hiniq can 'ngah wa can rìh. Haq hadai bahmàng mangai bìac nan xa da Chuaq Jêxu. Hiniq Jon: “Chuaq Loq Xa-õch;” “Chuaq am dech.”

Jon khoi canao loq can rìh da mangai Yothaiq èh bàc yàng achih hlài bìac aih. Bàc bàu haq achih aih taiq i mangai ngan hnoq bìac aih broq loh. Sech cô khoi achih hanam 85 Atiq C.

Bàu Anoi:
Jon achih sech cô taiq haq enh dìq ca mangai canao loq ca Chuaq Jêxu wa jah dèch claih: “Mahaq khoi achih bìac cô waq ca pì lùì Chuaq Jêxu, Haq Chuaq Crich, Con da Boc Plình, wa nhò manoh lùì aih, oh daq jah rìh ta hiniq Haq”. (Jon 20:31).

- Rìm 'Nat:*
1. Bàu Baxèm: 1:1–18
 2. Bìac Baxèm Broq da Chuaq Jêxu: 1:19–51
 3. Bìac Broq da Chuaq Jêxu: Bàu Halac wa Bàu Hnài: 2:1—11:57
 4. Bìac nan xa da Chuaq Jêxu: 12:1—19:42
 5. Can Rìh Hlài: 20:1–29
 6. Bàu gleq achih: 20:30–31

7. Bàu Pulùch: 21:1–25

Bàu Wìh Wìa Chac Hamac

¹ Calah baxèm i Bàu, Bàu cô ôi ti Boc Plình. Bàu cô raq Boc Plình. ² Enh jò baxèm Haq khoi ôi pajùm ti Boc Plình. ³ Calah baxèm, Haq khoi broq rìm hiniq, enh gùng ca Haq, ùh i ca cleq ma wìa ðeh. ⁴ Haq raq xem can rìh wa can rìh cô aih can 'ngah am ca con mangai. ⁵ 'Ngah cô xreo ôi ti clam, clam ùh ta'blêq ca 'Ngah.

⁶ I mòiq ngai Boc Plình thê lam trùh, hiniq haq Jon. ⁷ Mangai aih trùh anoi hlài ca wì biac Can 'Ngah, ðòiq ðiq ðõng mangai leq tàng haq, èh jah lùì. ⁸ Haq ùh xài Can 'Ngah cô, mahaq haq lam anoi hlài ca wì biac Can 'Ngah.

⁹ Can 'Ngah cô, Haq Can 'Ngah joq 'nàng khoi trùh crõng taneh, jah xreo 'ngah rìm ngai. ¹⁰ Haq khoi ôi ta crõng taneh ma cla Haq khoi broq, mahaq mangai ôi crõng taneh ùh canao loq ca Haq. ¹¹ Haq khoi trùh ðeh ta gùng, mahaq con mangai ùh ðìh yõc Haq. ¹² Mahaq mangai leq ma nhàn yõc Haq, aih lùì hiniq Haq, Haq am ca wì cwàng wìh wìa con caiq Boc Plình. ¹³ Wì aih ùh xài xa-ông nhò mahem, ùh xài tiaq trong chac hamac, ùh xài tiaq trong manoh con mangai ma enh, mahaq Boc Plình ma xa-ông.

¹⁴ Bàu cô khoi wìh wìa chac hamac ôi ta'ne bèn, bình halùih biac am dech wa bàu joq 'nàng. Bèn khoi ngan hnoq 'ngah 'ngai lem lình enh Haq, joq 'nàng 'ngah lem loh enh Con Mòiq trùh enh nòì Baq.

¹⁵ Jon ta'mon hlài biac Haq. Jon creò doi 'màng cô: “Aih Mangai au khoi doi, Haq trùh atìq ca au. Haq yi càn ca au, ma jah 'màng aih Haq i adroi ca au.” ¹⁶ Biac am dech khoi ùc bình ôi enh dalam ca Haq, Haq khoi ùc bình ca bèn ðiq ðõng, am dech rai èh rai bàc. ¹⁷ Joq 'nàng 'màng aih, Ranenh khoi am ca bèn nhò Môise, mahaq Chuaq Jêxu Crich khoi am ca bèn biac am dech wa bàu joq 'nàng. ¹⁸ ùh

i cabô ma khoi hnoq Boc Plình enh gùng ca Con Mòiq ỏi dèh ti manoh Baq. Haq raq khoi patô am ca bèn loq ca Baq.

Bàu Anoi Hlài Da Jon 'Baptit

(Mat 3:1-12; Mốc 1:2-8; Luc 3:15-17)

¹⁹ Cô bàu Jon anoi hlài jò mangai Yothaiq thê 'bài pajàu wa mangai Lêwi enh Jê-ru-sa-lem lam trùh bòch haq: “Ìh cabô?” ²⁰ Jon anoi hlài ma ro, ùh cadoc hangah cleq, haq doi: “Au ùh xài Crich.”

²¹ Wì bòch haq: “Ta 'màng aih, ìh cabô? ìh Êli ùh xài?”

Haq doi: “Ừh xài.”

“Ìh ajoq Mangai capoch thai Boc Plình nhèn ma gòm ùh?”

Jon tèo: “Ừh xài.”

²² Wì bòch tam haq: “Ta 'màng aih, ìh cabô? Doi beq, òiđiq nhèn anoi hlài ca wì ma thê nhèn bòch ìh. Cla ìh doi dadeh cabô?”

²³ Haq tèo: “Au bàu mangai creo ta ðùng hawit phai broq ma jang trong Chuaq.”[✠] 'Màng ca pajàu Êsai khoi doi.

²⁴ Wì ma lam bòch Jon, aih mangai Pha-ri-si khoi thê trùh. ²⁵ Wì bòch haq: “Gleq ma jah ìh 'baptem tàng ìh ùh xài Crich, loq Êli, loq Mangai capoch thai Boc Plình aih?”

²⁶ Jon doi: “Au broq 'baptem xam diac, mahaq i Mòiq Ngai yòng ỏi ta'ne pì, pì ùh loq ca Haq. ²⁷ Haq trùh ta cô atiq ca au, mahaq au ùh ðang òiđiq ðõih caxi jai Haq.”

²⁸ Wì anoi biac cô ỏi ta 'Bê-tha-ni pah tau cròng diac Jôđan, nòi Jon ma 'baptem.

²⁹ Trùh hì ma atiq, Jon hnoq Chuaq Jêxu lam trùh ti haq. Haq doi: “Tau, Trìu Con Boc Plình, aih Haq ma pòq yòc ðiq ðõng tôiq lôi con mangai crõng taneh. ³⁰ Mangai cô, aih Haq ma au khoi doi ca pì. Haq trùh ta cô atiq ca au. Haq broq càn yi hnao ca au, ma jah 'màng aih, au 'nhòq i, Haq

✠ 1:23 1:23 Êsai 40:3.

khôi i. ³¹ Adroi, au ùh loq ca Haq, mahaq manàiq cô au khôi trùh ta cô broq 'baptem xam diac òđiq patô Haq ca jàn Is-ra-ên."

³² Jon anoi hlài 'màng cô hòm: "Au khôi hnoq Yiang Hadròih tìah ca chìm trù, loh enh plình jràp òi ti Haq. ³³ Adroi au ùh loq ca Haq, mahaq Chuaq ma thê au broq 'baptem xam diac, Haq doi ca au: 'Jò ìh hnoq Yiang Hadròih loh, jràp òi ti mangai leq, Mangai aih raq broq 'baptem xam Yiang Hadròih.' ³⁴ Au khôi hnoq 'màng cô, ma jah au anoi hlài, Mangai cô Haq Con Calô Boc Plình."

Mangai Hõc Tiaq ma Adroi Baxèm

³⁵ Hì da èh, jò Jon yòng ti baiq ngai, mangai hõc tiaq haq, ³⁶ haq hnoq Chuaq Jêxu lam ti trong, haq doi ca wa: "Ngan tau, Trù Con Boc Plình!"

³⁷ Baiq ngai mangai hõc tiaq tàng bàu aih, hi lam tiaq Chuaq Jêxu. ³⁸ Chuaq Jêxu wìh hlài ngan wa tiaq Haq, bòch: "Chòp chaq cleq?"

Wa tèo: "Rabi," aih Thài, "Ìh òi ta leq?"

³⁹ Haq doi: "Lam ngan beq!"

'Màng aih, wa lam hnoq nòi Haq òi. Jò aih khôi jah pôn jò chiù. 'Màng aih wa òi hlài ti Haq trom hì aih.

⁴⁰ Wa baiq ngai ma tàng Jon doi wa tiaq Chuaq Jêxu, mòiq ngai aih Anrê, oh Simôn Pêtrô. ⁴¹ Bìac baxèm haq broq, aih haq lam chaq dèh daq, aih Simôn. Haq doi: "Bèn khôi hnoq Mangai Mési" Aih hiniq, Crich. ⁴² Haq 'ràng Simôn trùh ti Chuaq Jêxu.

Chuaq Jêxu ngan haq, èh doi ca haq: "Ìh Simôn, con Jon, pàng cô ta èh jah creò hiniq ìh, Sêpha." (Aih Pêtrô, i hiniq hmu).

⁴³ Loh hì atìq, Chuaq Jêxu enh lam Ga-li-lê chaq hnoq Philip, Haq doi: "Lam tiaq Au beq."

⁴⁴ Philip haq mangai 'Bê-t-sai-đa, aih phôq da Anrê wa Pêtrô. ⁴⁵ Philip glàm Nê-tha-nên, doi ca haq: “Nhèn khoi hnoq Mangai ma Môise khoi achìh ta sech Ranenh, wa wì mangai capoch thai Boc Plình hadai khoi achìh, aih Chuaq Jêxu ỏi Na-xa-ret con Jôsep.”

⁴⁶ Nê-tha-nên padreo bàu doi: “Ma i hiniq cleq lem jah loh enh Na-xa-ret?”

Philip doi: “Lam ngan beq!”

⁴⁷ Chuaq Jêxu hnoq Nê-tha-nên lam trùh ti Haq, Chuaq Jêxu doi: “Ngan cô, mòiq ngai Is-ra-ên joq 'nàng, mangai ma ùh i bìac amòng cleq ỏi enh dalam manoh haq.”

⁴⁸ Nê-tha-nên doi ca Haq: “Gleq ìh ma loq ca au?”

Chuaq Jêxu tèo: “Jò Philip 'nhòq creò ìh, Au khoi hnoq ìh ỏi ti yàp long póc.”

⁴⁹ Nê-tha-nên doi: “Ôi Thài, ìh joq Con Calô Boc Plình. ìh Bùa Diac Is-ra-ên.”

⁵⁰ Chuaq Jêxu doi: “Ma jah 'màng aih, Au khoi anoi ca ìh, Au hnoq ìh ỏi ti yàp long póc, èh ìh i manoh lùì Au. ìh jah hnoq ca bìac yì càn, yì hnao bìac aih!” ⁵¹ Chuaq Jêxu doi ca haq: “Jòq 'nàng, Au anoi ca pì, pì jah hnoq 'plình tapèh, 'bình plình jah tấc loh ti’[☆] Con Mangai.”

2

Ban Ớng Mai ta Cana

¹ Piq hì atìq, i wì ban ớng mai ỏi ta phôq Cana, ỏi ta gùng Ga-li-lê. I miq Chuaq Jêxu ỏi ta aih. ² Wì pachùh Chuaq Jêxu wa mangai hóc tiaq Haq trùh caq hiniang ban ớng mai. ³ Jò alac nho khoi đìq, miq Chuaq Jêxu doi ca Haq: “Wì pi i ca alac nho.”

⁴ Chuaq Jêxu doi: “Ôi miq, hiniq aih ùh xài bìac miq leq, 'nhòq trùh jò da Au broq bìac.”

[☆] 1:51 1:51 BB 28:12.

⁵ Miq Haq doi ca wì hapǒng ma patìh caq ôq hì aih: “Haq thê pì broq cleq, pì phai iu bàu Haq.”

⁶ Jang aih i tadràu toq padrì broq xam hmu, mòi q toq ðòiq jah 80 trùh 120 lít diac ðòiq 'nheo tì tiaq lè da mangai Yothaiq.

⁷ Chuaq Jêxu doi ca wì: “Ùc bình diac rìm padrì beq.” Wì ùc trùh angah haq.

⁸ Chuaq Jêxu doi: “Manàiq cô gôch beq, 'ràng ca mangai ma wèq 'bài mangai patìh.”

Wì gôch 'ràng ca haq. ⁹ Jò mangai ma wèq mangai patìh ôq thù toq 'biaq diac ma khoi wìh wìa alac plì nho, (haq ùh 'nì alac cô khoi i enh leq, mahaq 'bài mangai patìh ma gôch diac aih loq), haq ma wèq mangai patìh creó ca mangai con ǒng, ¹⁰ doi: “Jò wì caq ôq ban ǒng mai, baxèm adroi, wì padon alac nho jìang. Khoi ca wì ôq bàc, wì am alac nho ùh jìang, mahaq da ìh khoi wèq alac nho yi jìang trùh manàiq.”

¹¹ Ta Cana gùng Ga-li-lê Chuaq Jêxu broq teo halac baxèm, aih patô biac 'ngah 'ngai lem lình Haq. Wì mangai hóc tiaq lùì Haq.

¹² Khoi èh, Haq lam ta phôq Ca-bê-na-um ti miq Haq, wì oh Haq wa mangai hóc tiaq Haq. Wì ǒi ta aih toq 'biaq hì.

Chuaq Jêxu Hnan Wì Mangai Padre Loh Khoi Enh Hnem Cùh Waiq

(Mat 21:12-13; Mǒc 11:15-17; Luc 19:45-46)

¹³ Hì Lè Lam Cwa mangai Yothaiq trùh. Chuaq Jêxu tǒc phôq Jê-ru-sa-lem. ¹⁴ ǒi ta Hnem Cùh Waiq Haq hnoq mangai tech 'bo, trùu, chìm trù, wa mangai halìh 'bac ha'ngui ti aih. ¹⁵ Chuaq Jêxu caxenh caxi broq long roi, jêh hnan wì, thê wì ðìq ðǒng loh enh gùng ca Hnem Cùh Waiq; trùu, 'bo hadai. Haq ùc cađac 'bac wì ma halìh, ùc đac ca'bǒng wì. ¹⁶ Haq doi ca wì ma tech chìm trù: “'Ràng

'noh enh gùng beq, apaq broq hnem Baq Au loh hnem padro.”¹⁷ Wì mangai hóc tiaq Haq hmàng hlài bàu khoi achih: “Dài Au loq waq ca hnem Chuaq òiq ca jaq, aih tiaq ca ùnh ta manoh broq nan xa ca Au.”[☆]

¹⁸ Wì mangai Yothaiq bòch Haq: “Ìh i ca teo halac leq òòiq patô ca nhèn hnoq, ìh i cwiàng òòiq broq biac cô?”

¹⁹ Chuaq Jêxu padreo bàu doi: “Raliang Hnem Cùh Waiq cô beq, piq hì èh, Au jah broq hlài!”

²⁰ Wì mangai Yothaiq doi: “Wì broq gêh Hnem Cùh Waiq hadròih cô òiq 46 hanam, ìh broq hlài piq hì 'mòh?”

²¹ Mahaq Haq anoi hnem hadròih, aih chac Haq. ²² 'Màng aih, atìq ca Haq cachit rìh hlài, mangai hóc tiaq hmàng hlài bàu aih. Wì lùì bàu Sech Hadròih, wa bàu Chuaq Jêxu khoi doi.

²³ Jò Chuaq Jêxu òi ta Jê-ru-sa-lem, aih jò Lè Lam Cwa, i bàc mangai tiaq Chuaq ma jah 'màng aih wì khoi hnoq teo halac Haq ma broq. ²⁴ Mahaq Chuaq Jêxu ùh canòm ca wì haq, ma jah 'màng aih Haq loq ca manoh òiq ca mangai, ²⁵ ùh nhet ca mangai leq anoi hlài ca Haq con mangai 'màng leq, taiq Chuaq Jêxu khoi loq adroi i bàc cleq enh trom manoh mangai.

3

Chuaq Jêxu Capoch Tàng ca Ni-cô-đem

¹ I mòiq ngai, mangai Pha-ri-si, hiniq haq Ni-cô-đem. Haq mòiq ngai ta 'bài mangai ma wèq cwiàng òi ta mangai Yothaiq. ² Damang haq lam trùh ti Chuaq Jêxu, doi 'màng cô: “Nhèn loq ca Ìh Mangai Thài hnài trùh enh Boc Plình, ma jah 'màng aih ùh i ca mangai leq jah broq teo halac ma ìh khoi broq, tàng Boc Plình ùh òi ti Haq.”

[☆] 2:17 2:17 BCP 69:9.

³ Chuaq Jêxu padreo hlài bàu, doi ca haq: “Au doi ca ìh bàu joq 'nàng: Tàng con mangai ùh xa-ông hlài, haq ùh jah hnoq Diac Boc Plình.”

⁴ Ni-cô-đem bòch Haq: “Mangai khoi craq, broq 'màng leq ma jah xa-ông hlài? Ma jah mùt hlài dèh ta cliac miq òi q jah xa-ông hlài yàng ma baiq 'mòh?”

⁵ Chuaq Jêxu tèo haq: “Au doi ca ìh bàu joq 'nàng: Tàng mangai leq ùh canòm ca diac wa Yiang Hadròih ma xa-ông, ùh i cabô jah mùt Diac Boc Plình. ⁶ Cleq ma xa-ông tiaq chac hamac, aih loh chac hamac. Cleq ma xa-ông tiaq Yiang Hadròih, aih loh yiang. ⁷ Apa q hamàih ta manoh Au doi ca ìh, ìh phai xa-ông hlài. ⁸ Cayeo enh hlôi ta leq, hi hlôi. Ìh tàng atêh, mahaq ùh 'nì cayeo trùh enh leq wa hadai ùh 'nì cayeo hlài ta leq. Mangai jah Yiang Hadròih xa-ông hadai 'màng aih.”

⁹ Ni-cô-đem padreo hlài bàu doi: “Broq 'màng leq ma jah broq bìac cô?”

¹⁰ Chuaq Jêxu tèo: “Ìh broq boc thài hnài wì Is-ra-ên, mahaq ìh ùh 'nì tàng bàu cô 'mòh? ¹¹ Au doi ca ìh bàu joq 'nàng: Nhèn capoch bàu ma nhèn khoi loq. Nhèn anoi hlài bìac nhèn khoi hnoq, mahaq pì ùh lùì bàu nhèn. ¹² Tàng Au doi ca pì bìac òi ta crõng taneh cô, mahaq pì ùh lùì, ùh dùh dèh Au doi ca pì bìac òi ta Diac Plình, pì jah lùì 'màng leq? ¹³ Ùh i ca mangai leq khoi tõi ta Diac Plình, enh gùng ca Haq ma khoi loh enh Diac Plình, aih Con Mangai. ¹⁴ 'Màng ca Môise khoi atua bìh òi ta nòi òi q hawit 'màng leq, Con Mangai hadai chiùq atua 'màng aih, ¹⁵ waq ca mangai leq loq lùì canòm ca Haq i can rìh hloi hloi dalam Haq.

¹⁶ “Taiq Boc Plình loq waq ca mangai òi crõng taneh trùh 'mòi Haq khoi am ca wì Con Mòiq da Haq, waq ca mangai leq lùì canòm ca Con aih, ùh hnhung, mahaq jah i can rìh hloi hloi. ¹⁷ Ma jah 'màng aih, Boc Plình thê Con

Mòiq da Haq trùh ta crõng taneh, ùh xài thê Haq hadrah ta'mòq tôiq, mahaq waq ca wì canòm Haq òiôiq jah dèch. ¹⁸ Mangai leq khoi lùì canòm Haq ùh 'bìq hadrah ta'mòq tôiq. Mangai leq ùh lùì Haq, mangai aih khoi 'bìq hadrah ta'mòq tôiq adroi, taiq haq ùh chiùq lùì canòm hiniq Con Mòiq da Boc Plình. ¹⁹ Bìac hadrah ta'mòq tôiq aih 'màng cô: Can 'Nghah khoi trùh xreo crõng taneh, mahaq wì loq enh can clam yi hnao ca Can 'Nghah taiq bìac wì broq aih ngang dù. ²⁰ Mangai ma leq broq dù, haq git ca 'ngah, ùh enh trùh ti 'ngah, yùq wì hnoq haq broq dù. ²¹ Mahaq mangai ma leq broq tiaq bàu joq 'nàng, haq lam trùh ti 'Nghah, waq ca wì jah hnoq bìac haq khoi broq, aih bìac Boc Plình enh.”

Jon 'Baptit Anoi Hlài Hòm

²² Khoi ca aih, Chuaq Jêxu wa mangai hõc tiaq Haq lam ta gùng Judia. Haq òi ta aih pajùm ca wì ma broq 'baptem. ²³ I Jon hadai broq 'baptem òi ta Ênôn haten Salim taiq i bàc diac òi ta aih. Bàc ngai adràc dabau trùh chiùq 'baptem. ²⁴ Jò aih Jon 'nhòq 'bìq rùp clêh ta tù. ²⁵ I mòiq ngai, mangai Yothaiq tarahen ca mangai hõc tiaq Jon bìac ranenh lè broq hreo. ²⁶ Wì trùh ti Jon doi: “Thài, jò ìh òi pah tau cròng diac Jôđan, i Chuaq Jêxu òi ti ìh. ìh khoi anoi hlài bìac Haq. Manàiq cô Haq broq 'baptem wa mangai òiq dõng lam trùh ti Haq.”

²⁷ Jon doi: “Ùh i ca mangai leq jah nhàn yõc bìac cleq tàng Boc Plình ùh am ca haq. ²⁸ Pì khoi tàng au doi: ‘Au ùh xài Crich, mahaq Boc Plình khoi thê au lam adroi ca Haq.’ ²⁹ Mangai leq ban mai, haq aih con õng. Mangai bua con õng yòng toq tamàng jò leq tàng bàu con õng, èh jò aih òi q jaq lem bùi. Taiq 'màng aih, au lem bùi joq 'nàng. ³⁰ Haq phai rai èh rai padèch ha'nhèq. Au phai rai èh rai ha'neq.”

³¹ Haq ma khi loh enh 'nhèq trùh ta cô, Haq yi ha'nhèq ca rìm ngai. Mangai leq loh enh crông taneh, haq mangai crông taneh wa capoch bàu crông taneh. Haq ma khi loh enh plình, Haq yi ha'nhèq, yi hnao rìm ngai. ³² Haq anoi hlài bìac Haq ma khi hnoq, bàu Haq ma khi tàng, mahaq ùh i ca mangai lùì bàu Haq. ³³ Mahaq tàng mangai leq ma khi lùì bàu Haq, wì jah anoi hlài Boc Plình aih i joq 'nàng. ³⁴ Ma jah 'màng aih, Haq ma Boc Plình thê trùh ta cô capoch bàu Boc Plình taiq Boc Plình am ca Haq Yiang Hadròih bình halùih. ³⁵ Baq loq waq ca Con, èh khi jao am òi q dõng rìm bìac ca Con. ³⁶ Mangai ma leq lùì canòm Con Mòiq da Boc Plình i can rìh hloi hloi. Mahaq mangai leq ùh iu tiaq Haq, ùh jah hnoq can rìh, mahaq can nòih Boc Plình òi hloi ti mangai aih.

4

Mangai Gu Cadrì Sa-ma-ri

¹ Chuaq Jêxu loq ca wì mangai Pha-ri-si khi tàng wì anoi, Haq khi creo tam mangai hõc tiaq wa broq 'baptem mangai yi bàc ca Jon, ² ('nhac ùh xài cla Chuaq Jêxu broq 'baptem am ca wì, mahaq mangai hõc tiaq da Haq broq.) ³ Jò aih Chuaq Jêxu loh enh gùng Judìa, hlài ta Ga-li-lê.

⁴ Haq phai lam pajang trong gùng Sa-ma-ri. ⁵ 'Màng aih, Haq trùh ta phòq 'yoh òi ta gùng Sa-ma-ri, hiniq aih Sikha, haten ca òùng taneh Jacôp khi am ca Jôsep con calô haq calah nèh. ⁶ Ta aih i adràm Jacôp. Taiq Chuaq Jêxu lam ta trong loq tagah lep, Haq ha'ngui haten ca adràm. Manàiq cô 'ne hì.

⁷ I mòiq ngai gu cadrì Sa-ma-ri trùh gòch diac. Chuaq Jêxu doi ca haq: “Xìn am ca Au ôq diac.” ⁸ Jò aih mangai hõc tiaq Haq khi mùt ta phòq rõt dahwèq caq.

⁹ Gu cadrì Sa-ma-ri cô doi ca Haq: “Ìh Mangai Yothaiq, gleq ma jah bòch ca au diac ôq da mangai gu cadrì Sa-ma-ri?” Ma jah 'màng aih mangai Yothaiq wa mangai Sa-ma-ri ùh capoch tùang ca dabau.

¹⁰ Chuaq Jêxu padreo hlài bàu doi ca haq: “Tàng ìh loq ca bìac ma Boc Plình am dech, wa loq Cabô ma bòch ca ìh diac ôq, ìh jah bòch Haq, èh Haq am ca ìh diac ôq, aih diac rìh.”

¹¹ Gu cadrì bòch Haq: “Thài ôi, adràm cô jrùq. ìh ùh i ca cleq òi q gôch. Broq 'màng leq ìh i diac rìh aih? ¹² Boc nhèn Jacôp òi q hlài adràm cô ca nhèn. Calah nèh cla Haq xôq ôq diac jàng cô, trùh con xau haq, wa ngè aban capò, 'bo haq hadai. Ta 'màng aih, ìh ma yi càn ca Jacôp 'mòh?”

¹³ Chuaq Jêxu tèo haq: “Mangai leq ôq diac cô, xôq ôi croh ranõng. ¹⁴ Mahaq cabô ôq diac Au am, ùh jò leq croh ranõng hòm. Diac Au am jah broq mech diac tamòc ôi enh dalam con mangai, èh jah rìh hloi hloi.”

¹⁵ Gu cadrì doi ca Haq: “Ôi Thài, xìn am ca au diac aih, waq ca au ùh hìaq croh ranõng, wa ùh hìaq xalep trùh jang cô gôch diac hòm.”

¹⁶ Chuaq Jêxu doi ca haq: “Hlài beq, creo ca õng ìh, èh chòp lam ta cô.”

¹⁷ Gu cadrì tèo: “Au ùh i ca õng.”

Chuaq Jêxu doi ca haq: “Ìh doi au ùh i ca õng, bàu cô troq, ¹⁸ ma jah 'màng aih, ìh khai i padam ngai õng, manàiq cô mangai ma 'nang rìh ti ìh, aih ùh xài õng ìh. Bìac aih ìh khai doi bàu joq 'nàng.”

¹⁹ Gu cadrì doi: “Thài ôi, au hnoq ìh joq mangai capoch thai Boc Plình. ²⁰ Boc yaq nhèn khai cùh waiq ôi ti wang cô, mahaq pì mangai Yothaiq cùh waiq ôi ti Jê-ru-sa-lem.”

²¹ Chuaq Jêxu doi ca haq: “Ìh phai lùì bàu Au. Pàng cô ta èh, pì jah cùh waiq Baq ùh xài ôi ti wang cô, ùh xài ta Jê-ru-sa-lem. ²² Pì mangai Sa-ma-ri, pì cùh waiq bìac

ma pì ùh 'nì. Nhèn loq bìac nhèn cùh waiq, taiq trong dèch claih con mangai trùh enh xinoi Yothaiq. ²³ Mahaq i jò trùh èh, joq 'nàng jò aih trùh manàiq cô, mangai cùh waiq ma troq, aih wì ma cùh waiq xam yiang, xam manoh joq 'nàng, taiq Baq chaq mangai 'màng cô cùh waiq Haq. ²⁴ Boc Plinh, Haq Yiang wa mangai leq cùh waiq Haq, phai yốc dèh mahua yiang wa manoh joq 'nàng òi q cùh waiq Haq.”

²⁵ Gu cadrì doi ca Haq: “Au loq Mèsi, aih Crich, phai trùh. Jò Haq trùh, Haq jah hnài bèn rìm trong òi q dồng.”

²⁶ Chuaq Jêxu doi ca haq: “Au, Mangai ma 'nang anoi ca ìh, Au raq cla Haq.”

²⁷ Wop jò aih, mangai hóc tiaq Chuaq Jêxu lam trùh. Wì hamàih ta manoh hnoq Chuaq Jêxu capoch tùang ca mangai gu cadrì, mahaq ùh i ca mangai leq hùà bòch Haq: “Ìh nhet cleq?” loq “Gleq ìh ma jah capoch tùang ca mangai gu cadrì cô?”

²⁸ Gu cadrì cô òi q cabi tùng diac ti aih, lam dech mùt ta plài doi ca wì: ²⁹ “Loh ngan Mangai cô beq! Haq khi anoi dồng òi q ca au bìac ma au khi broq. Mangai cô ma ùh xài Crich 'mòh?” ³⁰ Wì loh enh plài òi q lam trùh ti Chuaq Jêxu.

³¹ Jò wì 'nhòq trùh, mangai hóc tiaq Haq xìn Haq: “Thài caq beq!”

³² Haq doi ca wì: “Au i dahwèq caq ma pì ùh 'nì.”

³³ Wì bòch dabau: “I mangai leq khi am ca Haq dahwèq caq?”

³⁴ Chuaq Jêxu tèò wì: “Dahwèq caq Au, aih tiaq manoh Baq Au ma thê Au trùh ta cô wa broq òi q bìac Haq. ³⁵ Ma ùh xài pì doi: ‘Òi pôn khê hòm hi trùh jò gat joq ùh?’ Mahaq Au doi ca pì ngan cô: Ngoi ngan òi q 'mau khi òi q, padon ca jò gat. ³⁶ Mangai gat, khi yốc dèh cùng baha, achauq 'mau genh ahlài ta hnem, aih tìah ca haq

dèch mangai òi q wì jah rìh hloi hloi. 'Màng cô mangai rai adrech wa mangai gat hadai lem bùi pajùm. ³⁷ I bàu joq 'nàng ma doi: 'Mòiq ngai rai adrech, mòiq ngai 'noi q gat.' ³⁸ Au khoi thê pì gat ðùng 'mau ma pì ùh lah rai; wì mangai 'noi q khoi abroq, èh pì jah nhàn yõc bìac ma wì khoi abroq."

³⁹ Òi ta phòq cô i bàc ngai Sa-ma-ri lùì Chuaq Jêxu taiq gu cadrì cô khoi anoi hlài ca wì bìac Chuaq Jêxu, doi: "Haq khoi capoch troq rìm bìac au ma khoi broq calah nèh."
⁴⁰ Wì mangai Sa-ma-ri trùh ti Chuaq Jêxu. Wì xìn Haq, waq ca Haq òi ta wì. Haq òi ti aih baiq hì. ⁴¹ Jò khoi jah tàng bàu Haq, mangai lùì Haq rai èh, rai bàc.

⁴² Wì doi ca gu cadrì: "Manàiq cô nhèn tiaq Haq, ùh xài toq canòm bàu ìh, taiq cla nhèn khoi tàng bàu Haq. Nhèn loq joq 'nàng Chuaq Jêxu, Haq Mangai Dèch da mangai crõng taneh."

*Chuaq Broq Brêh Con Calô Cwan
(Mat 8:5-13; Luc 7:1-10)*

⁴³ Chuaq Jêxu òi ta Sa-ma-ri baiq hì, èh Haq lam ta Ga-li-lê, ⁴⁴ 'nhac cla Haq khoi doi, ùh i ca mangai capoch thai Boc Plình leq ma jah padèch ha'nhèq dèh gùng haq. ⁴⁵ Jò khoi trùh crõng Ga-li-lê, mangai Ga-li-lê lem bùi ðìh Haq mùt ti wì, taiq wì khoi hnoq bìac Chuaq Jêxu ma khoi broq òi ta hì Lè Lam Cwa ta Jê-ru-sa-lem, ma jah 'màng aih wì hadai òi ta aih hì lè aih.

⁴⁶ Chuaq Jêxu hlài ta phòq Cana òi ta crõng Ga-li-lê, nòi Haq khoi broq diac wìa alac plì nho. I mòiq ngai cwan òi ta Ca-bê-na-um, con calô haq ùh hrõc. ⁴⁷ Jò haq tàng wì doi, Chuaq Jêxu khoi loh enh Judia mùt Ga-li-lê, mangai cwan aih lam trùh ti Chuaq Jêxu, xìn Chuaq lam ta Ca-bê-na-um, broq brêh ca con calô haq, ma jah 'màng aih con calô aih ten cachìt.

⁸ Chuaq Jêxu doi ca haq: “Yòng beq! Xùì dradrah cla ìh. Lam beq!” ⁹ Tajòì 'mòì haq jah broq brêh, xùì dèh dradrah, yòng lam.

Hì aih hì Sabat. ¹⁰ Wì mangai Yothaiq doi ca mangai ma neo jah broq brêh: “Hì cô hì Sabat, ìh ùh khòh xùì dradrah.”

¹¹ Mahaq haq doi ca wì: “Mangai ma broq brêh ca au, Haq doi ca au: ‘Xùì dradrah cla ìh, lam beq!’”

¹² Wì bòch haq: “Mangai ma doi ca ìh: Xùì dradrah lam beq, haq cabô?”

¹³ Mahaq mangai ma khoi brêh ùh 'nì Haq cabô, taiq Chuaq Jêxu khoi mùt pajùm bacc ngai ta aih.

¹⁴ Khoi èh, Chuaq Jêxu hnoq haq ỏi ta Hnem Cùh Waiq. Chuaq Jêxu doi ca haq: “Ngan cô, ìh khoi brêh. Pàng cô ta èh, ìh apaq broq tôìq hòìm, yùq biac 'noi q trùh ca ìh yi hnao ca cô.” ¹⁵ Mangai cô lam doi ca wì mangai Yothaiq, aih Chuaq Jêxu ma khoi broq brêh ca haq.

¹⁶ Taiq nen aih, wì mangai Yothaiq ti rùp Chuaq Jêxu taiq Haq broq biac cô ta hì Sabat. ¹⁷ Mahaq Chuaq Jêxu padreo hlài bàu doi: “Baq Au broq biac enh calah nèh trùh manàìq. Au hadai broq biac 'màng aih.” ¹⁸ Taiq 'màng aih, wì mangai Yothaiq chaq trong jêh cađac Chuaq Jêxu, taiq ùh xài Haq toq broq biac hì Sabat, mahaq taiq Haq doi, Boc Plình Baq Haq, aih Haq broq am dađeh da-adàng ca Boc Plình.

¹⁹ Taiq 'màng aih, Chuaq Jêxu padreo hlài bàu doi: “Au doi ca pì bàu joq 'nàng: Con Calô Boc Plình ùh canòm ca dađeh broq biac cleq. Con toq broq biac ma leq Con hnoq Baq broq. Dìq đống biac Baq broq, Con hadai broq 'màng aih. ²⁰ Baq loq waq ca Con, patô am ca Con biac ma Baq 'nang broq dìq đống rìm biac. Baq jah patô am ca Con biac yi càn, waq ca pì hamàih ta manoh. ²¹ 'Màng ca Baq broq mangai enh cachìt rìh hlài, wa am ca wì can rìh 'màng leq,

hadai 'màng aih, Con am can rìh ca mangai leq hi mac ca cla Haq enh waq. ²² Baq ùh hadrah mangai leq, mahaq Baq khi am ca Con cwìang òiòiq hadrah wì òiq òng, ²³ waq ca wì òiq òng iu Con 'màng ca wì iu Baq. Mangai leq ùh iu Con, aih ùh iu Baq, Haq ma thê Con trùh ta cô.

²⁴ “Au doi ca pì bàu joq 'nàng: Tàng mangai leq tàng bàu Au, wa lùì Baq Au ma thê Au trùh ta cô, mangai aih jah i can rìh hloi hloi wa ùh hìaq 'bìq hadrah. Haq khi loh enh can cachit mùt ta can rìh. ²⁵ Au doi ca pì bàu joq 'nàng: Jò ten trùh, manàiq khi trùh, jò mangai cachit jah tàng bàu Con Calô Boc Plình, wa wì mangai ma tàng bàu aih jah rìh hlài. ²⁶ Ma jah 'màng aih tìah ca Baq i can rìh, 'màng aih Baq khi am ca Con hadai i can rìh. ²⁷ Baq khi am ca Con cwìang hadrah taiq cla Con, Haq Con Mangai.

²⁸ “Apaq hamàih ta manoh bìac cô, ma jah 'màng aih, ten trùh jò òiq òng 'bài mangai khi cachit òi ta ralùng tàng bàu Haq, ²⁹ jah loh khi enh ralùng. Wì mangai khi broq lem rìh hlài èh jah rìh wa wì ma khi broq dù, èh wì rìh hlài òiòiq hadrah baxa. ³⁰ Au ùh jah tiaq dèh manoh enh broq bìac cleq. Au hadrah tiaq bìac Au tàng enh Baq. Bìac hadrah Au, aih ta-atoq, ma jah 'màng aih Au ùh tiaq manoh enh Au, mahaq tiaq manoh enh Baq ma thê Au trùh.

³¹ “Tàng Au anoi hlài bìac cla Au, pì ùh ðang ca lùì bàu cô. ³² Mahaq i Haq ma 'noi q anoi hlài bìac Au, Au loq bàu anoi hlài da Haq aih bàu joq 'nàng.

³³ “Pì khi bòch Jon. Haq khi anoi hlài bàu joq 'nàng. ³⁴ Au ùh canòm bàu con mangai khi capoch, mahaq Au doi ca pì bìac cô waq ca pì jah dèch. ³⁵ Jon, haq ðen khi bùh broq 'ngah. Jò pì òi ti 'ngah haq, pì bùì lem ò.

³⁶ “Mahaq Au i bàu anoi hlài càn yi hnao ca bàu anoi hlài da Jon, taiq bìac Baq ma thê Au broq gèh bìac Au broq, aih patô joq 'nàng Baq khi thê Au trùh. ³⁷ Baq ma thê Au trùh

ta cô, Haq khoi anoi hlài bìac Au. Pì ùh lah tàng bàu Haq, hadai ùh lah hnoq Haq. ³⁸ Pì ùh i ca bàu Haq òi ta manoh pì, ma jah 'màng aih pì ùh lùì Haq ma thê Au trùh ta cô. ³⁹ Pì đóc Sech Hadròih, pì xoh dèh i can rìh hloi hloi òi ti aih, mahaq Sech Hadròih, aih anoi hlài bìac Au. ⁴⁰ Mahaq pì ùh enh trùh ti Au đòiq jah i can rìh.

⁴¹ “Ùh xài Au nhàn yốc 'ngah 'ngai enh con mangai, ⁴² mahaq Au loq ca pì ùh i ca manoh loq waq Boc Plình. ⁴³ Au canòm hiniq Baq ma trùh ta pì, mahaq pì ùh đìh yốc Au. Tàng i mangai ma crài canòm dèh hiniq trùh ta pì, pì jah đìh yốc haq. ⁴⁴ Broq 'màng leq pì ma lùì jò pì enh toq nhàn bàu manè enh dabau yi hnao ca pì ti chaq bàu manè ma toq loh enh Boc Plình hêq?

⁴⁵ “Apaq hèm ta manoh Au jah takian ca pì enh ngìa ca Baq, mahaq haq ma takian ca pì, aih Môise, mangai pì canòm. ⁴⁶ Ma jah 'màng aih, tàng pì khoi lùì Môise, pì hadai jah lùì Au, taiq haq khoi achìh bìac Au. ⁴⁷ Mahaq tàng pì ùh lùì bàu haq ma khoi achìh, pì jah lùì bàu Au 'màng leq?”

6

Chuaq Jêxu Broq 'Benh 'Mi Am 5.000 Ngai

¹ Khoi èh Chuaq Jêxu cwa pah tau diac raxìq Ga-li-lê, aih diac raxìq Ti-bê-ri-at. ² Mòiq lùì bàc ngai tiaq Haq, taiq wì khoi hnoq teo halac Chuaq Jêxu ma broq òi ti chac wì mangai ùh hróc. ³ Chuaq Jêxu tócc ta wang ha'ngui pajùm ti mangai hóc tiaq Haq. ⁴ Jò hì Lè Lam Cwa ten trùh.

⁵ Chuaq Jêxu ngan hnoq wì mangai bàc hrìn lam trùh ti Haq. Haq doi ca Philip: “Bèn lam rôt 'benh òi nòi leq đòiq am ca wì caq?” ⁶ Haq bòch bàu aih đòiq Haq thù Philip, ma jah 'màng aih Haq khoi loq adroi Haq phai broq cleq.

⁷ Philip tèo: “Rôt 200 òi đùng đê-na-ri 'bac 'benh mì xôq ùh tàu am ca wì mòiq ngai toq 'biaq.”

⁸ I mòiq ngai, mangai hóc tiaq Chuaq Jêxu, aih Anrê, oh Simôn Pêtrô, doi ca Haq: ⁹ “I mòiq ngai con calô 'yoh òi ta cô, haq i padam toq 'benh 'mau mat, baiq pliang ca, mahaq broq 'màng leq mangai bàc 'màng cô?”

¹⁰ Chuaq Jêxu doi: “Thê wì haq ha'ngui.” Ta aih i bàc nhat. Wì haq ha'ngui, rên toq gu calô i 5.000 ngai. ¹¹ Chuaq Jêxu yóc 'benh mì cô, manè pôi Boc Plình, khi êh, Haq axong ca mangai ha'ngui. Haq hadai axong ca ca wì hi mac ca wì enh waq.

¹² Jò wì khi panàc, Chuaq Jêxu doi ca mangai hóc tiaq Haq: “Ti tóch hlài òiq bàc ha'nech 'benh khi padah, òòiq ùh hìaq cađac hnhung.” ¹³ Wì tóch hlài 'bài ha'nech da padam toq 'benh 'mau mat atìq ca wì ma khi caq, jah 10 baiq rojo.

¹⁴ Jò wì hnoq trong halac ma Haq khi broq, wì doi: “Mangai cô joq 'nàng Mangai Capoch Thai Boc Plình phai trùh ta crõng taneh.” ¹⁵ Jò Chuaq Jêxu loq wì enh rùp panan Haq broq bùa, Haq tồc ta wang òi crài mòiq Ngai.

Chuaq Jêxu Cadiang lam ti Riang Diac Raxìq

¹⁶ Khi xèq, wì mangai hóc tiaq Haq loh ta diac raxìq. ¹⁷ Wì tồc ta bong, waq ca cwa diac raxìq òòiq trùh Ca-bê-na-um. Manàiq khi clam. Chuaq Jêxu 'nhòq trùh ti wì. ¹⁸ Cayeo hlôi dèh broq ca diac lai laq càn. ¹⁹ Jò wì khi chùng bong jah padam loq tadrâu khê sôq, wì hnoq Chuaq Jêxu lam ti riang diac raxìq, ten trùh ti wì. Wì yùq crè. ²⁰ Mahaq Chuaq Jêxu doi ca wì: “Au cô, apaq yùq.” ²¹ Jò aih, wì thê Haq tồc ta bong. Tajòì 'mòi bong khi trùh ti 'bò diac ma wì waq ca trùh.

'Benh Can Rìh

²² Hì atìq, bàc ngai yòng pah tau diac raxìq. Wì khi hnoq òi jang aih i mòiq toq bong. Mangai hóc tiaq da Chuaq Jêxu tồc ta bong, mahaq Chuaq Jêxu ùh tồc ta bong

dèh ti 'bài mangai hóc tiaq. ²³ Hadai i bàc bong ma 'noiç loh enh Ti-bê-ri-at trùh haten ca nòi ma Chuaq Jêxu am ca wì caq atiq ca Haq manè pôi. ²⁴ Jò wì khoi loq Chuaq Jêxu wa mangai hóc tiaq Haq ùh òi jang aih hòm, wì hadai tồc ta bong trùh ti Ca-bê-na-um, chaq Chuaq Jêxu.

²⁵ Jò wì hnoq Haq òi pah tau diac raxìq, wì bòch Haq: “Thài, ìh trùh ta cô jò leq?”

²⁶ Chuaq Jêxu doi: “Au doi ca pì bàu joq 'nàng, pì chaq Au, ùh xài taiq pì khoi hnoq teo halac Au broq, mahaq taiq pì khoi jah caq 'benh panàc. ²⁷ Apaç àu ran hrìn ca dahwèq caq loq hnhung, mahaq phai ti chaq dahwèq ma jah i can rìh hloi hloi Au jah am ca pì, tiaq Boc Pình Baq Au enh, taiq Haq khoi rài h Au broq 'màng cô.”

²⁸ Wì doi ca Haq: “Đòiç nhèn jah broq bìac Boc Pình, nhèn phai broq cleq?”

²⁹ Chuaq Jêxu tèo wì: “Bìac broq da Boc Pình, aih lùì Haq ma Boc Pình thê trùh ta cô.”

³⁰ Ma jah 'màng aih wì doi ca Haq: “Tàng 'màng aih, ìh broq teo halac ma leq waq ca bèn hnoq òiç lùì ìh. ìh padon broq bìac cleq? ³¹ Boc yaq nhèn khoi caq mana òi ta nòi òùng braih càn, 'màng ca Sech Hadròih khoi achìh: ‘Haq am ca wì caq 'benh ma loh enh pình.’☆”

³² Chuaq Jêxu tèo wì: “Joa 'nàng, joq 'nàng, Au doi ca pì: Môise 'nhòç lah am ca pì 'benh enh pình, mahaq Baq Au ma am ca pì 'benh joq 'nàng, aih 'benh enh pình. ³³ Ma jah 'màng aih 'benh Boc Pình, aih 'benh enh pình loh òiç am can rìh ca crõng taneh.”

³⁴ Wì doi: “Chuaq òi, am ca nhèn 'benh aih hloi hloi.”

³⁵ Chuaq Jêxu tèo: “Au cô 'benh ma broq rìh. Mangai leq trùh ti Au, haq ùh pangot hòm wa mangai leq lùì Au, haq ùh croh ranõng hòm. ³⁶ Mahaq Au khoi doi ca pì: Pì

☆ 6:31 6:31 LEA 16:4; Nêh 9:15; BCP 78:24,25.

khôi hnoq Au, mahaq xôq ùh lùì Au. ³⁷ 'Bàì mangai leq Baq ma am ca Au èh, wì trùh ti Au wa mangai leq trùh ti Au, Au joq 'nàng ùh cađac haq. ³⁸ Ma jah 'màng aih, Au loh enh plình, ùh xài waq ca tiaq dèh manoh, mahaq waq ca tiaq manoh Baq ma thê Au trùh. ³⁹ Manoh enh da Baq ma thê Au trùh, aih mangai leq Haq ma khôi am ca Au, Au ùh cađac hnhung, mahaq hì ma atìq lùch Au jah broq wì ñìq ñông rìh hlài. ⁴⁰ Taiq manoh Baq Au 'màng cô: Mangai leq ngan hnoq Con Haq wa lùì Con aih, mangai cô i can rìh hloi hloi; hì ma atìq lùch Au broq haq rìh hlài.”

⁴¹ Wì mangai Yothaiq mamùc ca Haq taiq Haq khôi doi: “Au 'benh khôi loh enh plình.” ⁴² Wì doi: “Mangai cô, Haq Chuaq Jêxu, con Jôsep. Bèn loq ca miq wa baq Haq. Manàiq cô Haq hùa doi: ‘Au khôi loh enh plình. Bìac aih 'màng leq?’”

⁴³ Chuaq Jêxu doi: “Pì apaq mamùc mamac ca dabau. ⁴⁴ Ùh lah i mòiq ngai leq trùh ti Au tàng ùh i ca Baq 'ràng trùh. Mangai leq trùh ti Au, Au jah broq wì haq rìh hlài ñìq ñông hì ma atìq lùch. ⁴⁵ Bàu mangai capoch thai Boc Plình khôi achìh ta Sech Hadròih: ‘Wì ñìq ñông jah tàng bàu Boc Plình hnài.’[☆] Cabô tamàng bàu Baq wa hõc tiaq Haq, rìm ngai aih trùh ti Au. ⁴⁶ Ùh i ca mangai leq khôi hnoq Baq enh gùng Au ma khôi trùh enh Boc Plình, Au khôi hnoq Baq. ⁴⁷ Au doi ca pì bàu joq 'nàng: Mangai leq ma lùì Au, i can rìh hloi hloi. ⁴⁸ Au cô raq 'benh can rìh. ⁴⁹ Boc yaq pì òi ta nòi ñùng hawit, wì khôi caq mana, mahaq wì khôi cachìt. ⁵⁰ Cô 'benh loh enh plình. Mangai leq caq 'benh cô, haq ùh cachìt. ⁵¹ 'Benh ma broq ca con mangai rìh, aih raq 'benh ma khôi loh enh plình, aih Au cô. Mangai leq caq 'benh cô jah rìh hloi hloi. 'Benh ma Au am, aih 'benh waq ca pì mangai crõng taneh jah rìh, aih chac hamac Au.”

[☆] 6:45 6:45 Êsai 54:13.

⁵² Wì mangai Yothaiq tarahen ca dabau, doi: “'Màng leq Mangai cô jah am ca bèn caq chac hamac Haq?”

⁵³ Chuaq Jêxu doi ca wì: “Au doi ca pì bàu joq 'nàng, tàng pì ùh caq chac hamac Au, wa tàng pì ùh ôq mahem Au, pì ùh i can rìh òi ta pì. ⁵⁴ Mangai leq caq chac hamac Au wa ôq mahem Au, haq i can rìh hloi hloi, hì ma atiq lùch Au broq haq rìh hlài. ⁵⁵ Ma jah 'màng aih, chac hamac Au dahwèq caq joq 'nàng, wa mahem Au dahwèq ôq joq 'nàng. ⁵⁶ Mangai leq caq chac hamac Au wa ôq mahem Au, haq òi enh dalam ca Au, Au òi enh dalam ca haq. ⁵⁷ 'Màng ca Baq ma rìh hloi hloi thê Au trùh ta cô, nhò Haq Au hadai rìh, 'màng aih mangai leq caq Au taiq Au rìh, haq hadai rìh. ⁵⁸ Cô 'benh khoi loh enh plình. 'Benh cô ùh xài tiah ca 'benh Mana troi boc yaq pì khoi caq, khoi èh xôq cachit. Cabô caq 'benh cô jah rìh hloi hloi.” ⁵⁹ Chuaq Jêxu hnài bàu cô òi ta hnem tagop Ca-bê-na-um.

⁶⁰ Bàc ngai hóc tiaq Haq tàng bàu cô, wì doi: “Bàu cô xa ha'bo ca tàng! Cabô ma nui loq tàng?”

⁶¹ Chuaq Jêxu loq ca manoh wì mamùc. Haq doi ca wì: “Bàu aih broq ca manoh pì catđih cro ajoq? ⁶² Tàng pì jah hnoq Con Mangai hlài ta plình nòi Haq ma òi adroi nèh, pì hèm 'màng leq? ⁶³ Cla Yiang Hadròih men broq am can rìh. Chac hamac ùh i lòi q cacleq. Bàu ma Au khoi doi ca pì, aih bàu da Yiang Hadròih wa can rìh. ⁶⁴ 'Nhac 'màng aih, òi ta'ne pì xôq i mangai ùh lùì Au.” Taiq 'màng aih enh jò baxèm Chuaq Jêxu khoi loq cabô ùh lùì Haq wa cabô blòq Haq. ⁶⁵ Chuaq Jêxu òi doi ca wì: “Ma jah 'màng aih troi Au khoi doi ca pì, ùh i mangai leq jah trùh ti Au tàng Baq Au ùh am.”

Pêtrô Pa'noh Chuaq Jêxu

⁶⁶ Pàng jò aih i bàc ngai ma tiaq Haq ùh lam ti Haq hòm.

⁶⁷ Chuaq Jêxu bòch wì 12 ngai, mangai hõc tiaq Haq: “Pì hadai ùh enh lam tiaq Au hòm 'mòh?”

⁶⁸ Simôn Pêtrô tèo: “Waiq Chuaq, nhèn jah lam tiaq ðeh cabô? Ìh i bàu can rìh hloi hloi. ⁶⁹ Nhèn lùì ìh, hi loq joq 'nàng ìh raq Con Hadròih Boc Plình.”

⁷⁰ Chuaq Jêxu padreo hlài bàu doi ca wì: “Au khoi ràih pì 12 ngai, joq ùh? Mahaq ði ta pì i mòiq ngai, haq aih can kiac macwì!” ⁷¹ Chuaq Jêxu anoi bàu cô aih patô Juda, con calô Simôn Ich-ca-ri-ôt, ma jah 'màng aih haq mòiq ði ta 12 ngai, mangai hõc tiaq ma padon blòq Chuaq.

7

Wì Oh Chuaq Jêxu Ùh Lùì Haq

¹ Atìq ca aih, Chuaq Jêxu lam jàp gùng Ga-li-lê. Haq ùh waq trùh ta gùng Judìa hòm taiq wì mangai Yothaiq chaq trong jêh cadac Haq. ² Jò aih hi lè mangai Yothaiq ten trùh. Cô lè Hapom Broq ðò da wì haq. ³ Wì oh calô Chuaq Jêxu doi ca Haq: “Ìh phai loh enh cô lam Judìa beq, waq ca wì mangai hõc tiaq ìh hadai jah hnoq ìh broq bìac. ⁴ Ma jah 'màng aih, ùh i ca mangai leq broq bìac ta nòi hlèp jò cla haq enh waq ca bàc ngai loq ca dadeh. Taiq ìh khoi broq jah bìac cô, èh ìh khòh pa'noh dadeh ca phù cròng loq beq!” ⁵ Ma jah 'màng aih wì oh Haq hadai ùh lùì Haq.

⁶ Chuaq Jêxu padreo hlài bàu, doi: “ 'Nhòq trùh jò da Au lam, mahaq pì èh ùh kè jò leq, pì ji jah lam. ⁷ Wì mangai cròng taneh ùh jah git ca pì, mahaq wì git ca Au taiq Au anoi hlài wì broq bìac dù. ⁸ Pì lam caq lè beq! Au 'nhòq lam, ma jah 'màng aih 'nhòq trùh jò da Au.” ⁹ Khoi ca Haq anoi bàu cô, Haq ði hlài ta Ga-li-lê.

¹⁰ Mahaq jò wì oh Haq khoi lam caq lè, Chuaq Jêxu hadai lam, mahaq Haq lam hlèp taiq Haq ùh enh ca cabô loq.

¹¹ Mangai Yothaiq chaq Haq ta hì broq lè. Wì bòch dabau: “Haq òi ta leq?”

¹² Wì bàc ngai ta bahech ca dabau bàc biac Chuaq Jêxu. I mangai doi: “Haq Mangai lem.”

I mangai ma 'noi q doi: “Ùh xài, Haq padô 'nùt con jàn.”

¹³ Mahaq ùh i ca mangai capoch bàu ma ro taiq wì yùq ca mangai Yothaiq.

Chuaq Jêxu Hnài ta Hnem Cùh Waiq

¹⁴ Trùh 'ne jò lè, Chuaq Jêxu tồc ta Hnem Cùh Waiq, hnài wì. ¹⁵ Wì mangai Yothaiq hamàih. Wì bòch dabau: “Mangai cô ùh i lam hỏc, 'màng leq Haq ma rabiaq ca Sech Hadròih?”

¹⁶ Chuaq Jêxu tèo wì: “Bàu Au ma hnài pì, ùh xài bàu Au, mahaq bàu Haq ma thê Au trùh ta cô. ¹⁷ Mangai leq i manoh broq tiaq manoh enh da Boc Plình, haq jah loq biac Au ma hnài, aih loh enh Boc Plình, loq Au tiaq dềh manoh. ¹⁸ Mangai ma tiaq dềh manoh capoch, haq chaq trong òoiq mangai manè haq, mahaq Mangai ma chaq trong 'ngah 'ngai da Boc Plình ma khoi thê Haq trùh ta cô, aih Mangai broq biac joq 'nàng, Haq ùh amòng. ¹⁹ Môise ma ùh xài khoi am ca pì Ranenh 'mòh? Mahaq ùh i ca mangai òi ta pì ma tiaq Ranenh cô! Gleq pì chaq trong jêh cađac Au?”

²⁰ Wì mangai pajùm padreo hlài bàu, doi: “Ìh i can kiac òi ti chac ìh. Cabô chaq trong jêh cađac ìh?”

²¹ Chuaq Jêxu doi ca wì: “Au khoi broq mòi q biac, pì rìm ngai hamàih ta manoh. ²² Môise khoi am ca pì lè cat akia, ùh xài lè cô baxèm enh Môise, mahaq lè cô baxèm enh boc yaq pi calah nềh, èh pì broq lè cat akia ca mangai trom hì Sabat. ²³ Tàng hì Sabat jah broq lè cat akia wa xỏp ùh hiaq broq ùh troq ca Ranenh Môise, gleq pì ma loh nòih ca Au taiq hì Sabat Au khoi broq brềh òiq ca chac hamac mòi q

ngai? ²⁴ Apaḡ ngan toḡ biac enh gùḡ ðòiq hadrah, mahaḡ phai tiaḡ trong ta-atoḡ ðòiq hadrah.”

²⁵ Jò aih i wì mangai ta phòḡ Jê-ru-sa-lem doi: “Cò i joḡ Mangai wì ma chaḡ trong jêh caḡac Haḡ? ²⁶ Ngan cò! Haḡ capoch enh ngià ca wì, ùh i cabô leḡ doi cleḡ ca Haḡ. Dua mangai wèḡ cwìang khoi loḡ ca Haḡ joḡ 'nàng Crich, joḡ ùh? ²⁷ Bèn loḡ ca Mangai cò Haḡ loh enh leḡ, mahaḡ jò Crich trùh ta cò, ùh i ca cabô loḡ ca Haḡ trùh enh leḡ.”

²⁸ Jò Chuaḡ Jêxu 'nang hnài wì trom Hnem Cùh Waiḡ, Haḡ doi bàu dèh: “Joḡ, pì canao ca Au. Pì loḡ ca Au loh enh nòi leḡ! Au khoi trùh ta cò ùh xài taiḡ cla Au trùh ðeh, mahaḡ Haḡ ma Joḡ 'Nàng khoi thê Au trùh, pì ùh canao loḡ ca Haḡ. ²⁹ Au loḡ ca Haḡ, taiḡ Au loh enh Haḡ. Cla Haḡ khoi thê Au trùh ta cò.”

³⁰ 'Màng aih wì chaḡ trong rùp cật Haḡ, mahaḡ ùh i ca mangai leḡ bèḡ Haḡ taiḡ jò da Haḡ 'nhòḡ trùh. ³¹ Ta wì cò i bàc ngai lùì Haḡ, wì doi: “Jò Crich trùh ta cò, Haḡ jah broḡ teo halac yi hnao ca Mangai cò khoi broḡ ùh?”

Mangai Yothaiḡ Hatình Rùp Chuaḡ

³² Wì mangai Pha-ri-si tamàng wì bahech ca dabau biac Chuaḡ Jêxu 'màng aih. Wì pajàu càn wa wì Pha-ri-si thê mangai rap lam rùp Haḡ.

³³ Chuaḡ Jêxu doi ca wì: “Au òi ta pì toḡ 'biaḡ hòḡ, khoi èh, Au hlài ta Haḡ ma thê Au trùh ta cò. ³⁴ 'Nhac ca pì chaḡ Au, mahaḡ chaḡ ùh hnoḡ, ma jah 'màng aih pì ùh jah lam trùh nòi Au òi.”

³⁵ Wì mangai Yothaiḡ capoch tùang ca dabau, doi: “Mangai cò jah lam ta leḡ bèn chaḡ Haḡ ùh hnoḡ? Loḡ Haḡ lam ti wì mangai Yothaiḡ òi ta mangai Hilap, hnài wì mangai Hilap 'mòh? ³⁶ Bàu Haḡ i hiniḡ cleḡ ma Haḡ doi: Pì jah chaḡ Au, mahaḡ chaḡ ùh hnoḡ, ma jah 'màng aih, pì ùh jah lam trùh nòi Au?”

³⁷ Trùh hì lùch lè Broq Hapom Đò, aih hì ma yi càn ta òiq ca hì broq lè aih, Chuaq Jêxu yòng enh ngĩa ca wì creo bàu ðêh, doi: “Mangai leq croh ranõng, trùh ti Au beq, ôq beq! ³⁸ Mangai leq lùì Au, tiaq bàu troi Sech Hadròih khoi achìh, i cròng diac broq rìh halinh loh enh manoh Haq.” ³⁹ Haq anoi 'màng aih ðòiq patô ca wì loq ca Yiang Hadròih, ðòiq mangai leq lùì Haq èh jah nhàn yõc, ma jah 'màng aih Yiang Hadròih 'nhòq trùh, taiq Chuaq Jêxu 'nhòq jah 'ngah 'ngai lem linh.

⁴⁰ Jò wì tàng bàu cô, i mangai doi: “Mangai cô joq 'nàng Mangai capoch thai Boc Plinh am ca bèn.”

⁴¹ Wì ma 'noi q doi: “Cô Crich.”

I mangai 'noi q hòm doi: “Crich cleq ma loh enh gùng Ga-li-lê? ⁴² Sech Hadròih doi Crich, Haq xinoi Đawit, loh enh 'Bêl-lê-hem, phòq Đawit 'mòh?” ⁴³ 'Màng aih wì talah ca dabau taiq bìac Chuaq Jêxu. ⁴⁴ I 'nah ngai enh rùp Haq, mahaq ùh i ca mangai leq bèq tì ti chac Haq.

⁴⁵ Jò 'bài mangai rap hlài, wì pajàu càn wa mangai Pha-ri-si bòch wì haq: “Gleq pì ma ùh 'ràng Haq ta cô?”

⁴⁶ Wì mangai rap tèo hlài bàu, doi: “Ùh lah tàng mangai leq capoch bàu 'màng ca Mangai cô.”

⁴⁷ Wì Pha-ri-si bòch: “Cla pì khoi 'bìq Haq padô 'nùt pì 'mòh? ⁴⁸ Ma i ca mangai leq òi ta wì mangai craq, loq mangai Pha-ri-si khoi lùì Haq ðòh? ⁴⁹ Mahaq con jàn cô ùh 'nì ca Ranenh, ðang ca hanip wì haq!”

⁵⁰ Òi ta 'bài mangai Pha-ri-si aih, i mòiq ngai, hiniq haq Ni-cô-đem. Adroi ca aih, jò damang, haq khoi lam hmàih ca Chuaq Jêxu. Haq bòch wì: ⁵¹ “Ranenh bèn ma khòh ta 'mòq tôiq ca mangai leq ta jò 'nhòq tàng bàu cla Haq doi bìac Haq khoi broq 'mòh?”

⁵² Wì padreo hlài bàu doi: “Ìh hadai mangai Ga-li-lê 'mòh? Ìh chaq ta Sech Hadròih jah hnoq, ùh i ca mangai capoch thai Boc Plình leq jah loh enh Ga-li-lê!”

⁵³ Rìm ngai hlài dèh ta hnem.

8

Mangai Gu Cadrì Broq Tôiq

¹ Jò aih Chuaq Jêxu tồc ta wang Ôliu. ² Xrõih xroq Chuaq Jêxu hlài ta Hnem Cùh Waiq. Dìq ca jàn trùh ti Haq, hi khoi Haq ha'ngui hnài wì. ³ Jò aih, wì thài ranenh wa mangai Pha-ri-si 'ràng trùh mòiq ngai gu cadrì ma wì khoi rùp jò haq tango. Wì thê haq yòng ta'ne wì. ⁴ Wì doi ca Chuaq Jêxu: “Thài ôi, gu cadrì cô khoi jah rùp jò haq 'nang tango. ⁵ Tàng broq tiaq Ranenh da Môise thê, khòh tèm hmu jêh cađac mangai gu cadrì 'màng cô, mahaq ìh doi 'màng leq?” ⁶ Wì bòch Haq 'màng cô òiđiq bahlac Haq, chaq trong takian ca Haq.

Mahaq Chuaq Jêxu cùp gàu yốc hadrang tì achìh ta taneh. ⁷ Wì bòch yôt Haq, 'màng aih Haq yòng doi ca wì: “Ì mangai leq òi ta pì ma ùh lah broq tôiq, òiđiq haq tồch hmu tèm gu cadrì cô adroi beq.” ⁸ Khoi ca doi bàu cô, Chuaq Jêxu cùp gàu, yốc hadrang tì achìh ta taneh mòiq yàng hòm.

⁹ Wì ma tàng bàu cô, wì tiaq dabau loh lam tang ngai mòiq, mangai craq loh lam adroi. Chuaq Jêxu òi hlài mòiq ngai, wa gu cadrì aih xôq òi yòng ti aih. ¹⁰ Chuaq Jêxu yòng bòch mangai cadrì aih: “Wì ma kian ìh ta leq? Ùh i mangai leq ta'mòq tôiq ca ìh 'mòh?”

¹¹ Gu cadrì aih tèo: “Waiq Chuaq, ùh i.”

Chuaq Jêxu doi: “Au hadai ùh ta'mòq tôiq ca ìh. Lam beq, apaq broq tôiq hòm?”

Chuaq Jêxu Broq 'Ngh Crõng Taneh

¹² Mòiq yàng hòm Chuaq Jêxu doi ca wì: “Au Can 'Nghah crõng taneh. Mangai leq tiaq Au, èh ùh lam ta clam hòm, mahaq i Can 'Nghah da can rìh.”

¹³ Mangai Pha-ri-si doi: “Ìh anoi hlài bìac cla ìh. Bàu anoi hlài cô ùh đàng ca lùì.”

¹⁴ Chuaq Jêxu tèo hlài bàu wì: “'Nhac ca Au anoi hlài bìac cla Au, bàu Au xôq đàng ca lùì, ma jah 'màng aih, Au khoi loq Au trùh enh leq wa hlài ta leq, mahaq pì ùh 'nì Au trùh enh leq, hadai ùh 'nì Au lam ta leq. ¹⁵ Pì hadrah tiaq chac hamac. Au ùh hadrah cabô. ¹⁶ Mahaq, tàng Au hadrah èh, bìac hadrah aih ta-atoq, ma jah 'màng aih, ùh xài Au ỏi mòiq Ngai hadrah, mahaq Au hadrah pajùm ti Baq ma khoi thê Au trùh. ¹⁷ Khoi achìh ta sech ranenh pì: Tàng i baiq ngai anoi hlài mòiq bàu, aih đàng ca lùì. ¹⁸ Au mòiq Ngai anoi hlài bìac cla Au. Baq Au, Haq ma thê Au trùh ta cô, hadai anoi hlài am ca Au.”

¹⁹ Wì bòch Haq: “Baq ìh ỏi ta leq?”

Chuaq Jêxu tèo wì: “Pì ùh loq ca Au, hadai ùh loq ca Baq Au. Tàng pì loq ca Au, èh pì hadai khoi loq ca Baq Au.”

²⁰ Chuaq Jêxu doi bàu cô jò ỏi ta Hnem Cùh Waiq, haten ca thùng tah 'bac. ùh i cabô hnhu tì rùp Haq, ma jah 'màng aih jò da Haq 'nhòq trùh.

²¹ Haq anoi hòm ca wì: “Au loh lam, èh pì jah chaq Au, mahaq pì jah cachìt dèh ta tôiq lôì cla pì. Pì ùh jah trùh nòi Au ma padon lam.”

²² Wì mangai Yothaiq anoi ca dabau: “Haq khoi doi: Pì ùh jah trùh nòi Au ma lam, 'màng aih Haq jêh cađac dađeh 'mòh?”

²³ Haq anoi paro ca wì: “Pì loh enh 'neq. Au loh enh 'nhèq. Pì loh enh crõng taneh cô, mahaq Au ùh loh enh crõng taneh cô. ²⁴ 'Màng aih, Au doi ca pì: Pì jah cachìt dèh ta tôiq lôì cla tàng pì ùh lùì Au cô Chuaq Crich, èh pì ep cachìt dèh ta tôiq lôì cla pì.”

²⁵ Wì bòch Haq: “Ìh cô cabô?”

Chuaq Jêxu tèo: “Au khoi doi ca pì Au cabô enh jò baxèm raq. ²⁶ Au i bàc bìac anoi wa hadrah bìac da pì, mahaq Boc Plình ma thê Au trùh ta cô, Haq toq doi bàu joq 'nàng. Au loq anoi hlài ca wì ỏi ta cởng taneh bìac aih ma Au khoi tàng enh Haq.”

²⁷ Wì ùh 'nì tàng bàu Chuaq Jêxu anoi ca wì haq bìac Chuaq Baq. ²⁸ 'Màng aih, Chuaq Jêxu doi: “Jò leq pì dèch atua Con Mangai, jò aih pì jah loq cla Au cô Chuaq Crich. Au ùh tiaq dèh manoh broq bìac cleq, mahaq Au anoi hlài bìac cleq Baq Au ma khoi hnài Au. ²⁹ Haq ma thê Au trùh, jò leq xôq ỏi ti Au. Haq ùh jò leq cađac Au ỏi mòiđ Ngai taiq Au lem ca manoh Haq rìm trong.” ³⁰ Jò Chuaq Jêxu anoi ca wì bàu cô, i bàc ngai lùì Haq.

³¹ Manàiq cô, Haq hadai doi ca wì mangai Yothaiq ma khoi lùì Haq: “Tàng pì cajap manoh tiaq bàu Au, pì men broq mangai hóc tiaq joq 'nàng da Au. ³² Pì jah loq 'nì ca bàu joq 'nàng, wa bàu joq 'nàng cô jah lèh ca'naih pì.”

³³ Wì padreo hlài bàu doi: “Nhèn broq con caiq xinoi da Ap-ra-ham, ùh lah broq hapởng cabô. Gleq ìh ma jah doi: Jah lèh ca'naih pì?”

³⁴ Chuaq Jêxu doi: “Au doi ca pì bàu joq 'nàng: Mangai ma leq loq broq tôiq, haq broq hapởng ca tôiq lôi. ³⁵ 'Màng cô, hapởng ùh jah ỏi hloi ta hnem, mahaq con calô cla ma jah ỏi hloi ta hnem aih. ³⁶ 'Màng aih, tàng Con Boc Plình ca'naih pì, èh pì jah ùh tawac ùh pakènh joq 'nàng. ³⁷ Joq, Au loq ro pì xinoi da Ap-ra-ham, mahaq pì chaq trong jêh cađac Au, taiq bàu Au ùh jah mùt ta manoh pì. ³⁸ Au anoi hlài bìac Au ma khoi hnoq ỏi ti Baq Au. Pì broq bìac ma pì khoi tàng ỏi ti baq pì.”

³⁹ Wì padreo hlài bàu doi: “Baq nhèn aih Ap-ra-ham.”

Chuaq Jêxu doi: “Tàng pì broq con caiq Ap-ra-ham joq 'nàng, 'màng aih pì phai broq tiaq trong Ap-ra-ham ma

broq. ⁴⁰ Mahaq manàiq cô pì chaq trong jêh cađac Au, Mangai ma khoi anoi ca pì biac joq 'nàng Au ma tàng enh Boc Plình. Ap-ra-ham 'nhòq lah broq biac 'màng aih! ⁴¹ Pì hadai broq biac dù 'màng ca baq pì.”

Wì doi: “Nhèn ùh xài con tango anang. Nhèn i mòiq ngai Baq, aih Boc Plình.”

⁴² Chuaq Jêxu doi: “Tàng Boc Plình Baq pì, pì jah loq waq ca Au, ma jah 'màng aih taiq Au loh enh Boc Plình. ùh xài Au tiaq dèh manoh ma trùh ta cô, mahaq cla Haq thê Au trùh ta cô. ⁴³ Gleq pì ma ùh 'nì tàng bàu Au? Aih taiq pì ùh nui 'nì loq tàng bàu Au! ⁴⁴ Pì loh enh baq pì. Haq can kiac Satan wa manoh pì ham tiaq manoh haq. Enh calah baxèm haq jêh cađac mangai taiq haq ùh chiùq yòng pah biac joq 'nàng taiq ùh i ca biac joq 'nàng òi ti haq. Jò haq capoch amòng, aih haq capoch tiaq manoh haq, ma jah 'màng aih haq xem capoch amòng taiq haq broq baq da bàu capoch amòng. ⁴⁵ Taiq Au capoch bàu joq 'nàng ma pì ùh chiùq lùì Au. ⁴⁶ Òi ta pì i mangai leq rùp Au ta'mòq tôiq jah? Tàng Au capoch biac joq 'nàng, gleq pì xôq ùh lùì Au? ⁴⁷ Mangai ma leq broq mangai da Boc Plình, haq tamàng tiaq bàu Boc Plình. Pì ùh tamàng taiq pì ùh broq mangai da Boc Plình.”

⁴⁸ Wì mangai Yothaiq doi: “Nhèn doi, ìh Mangai Sa-ma-ri ma i can kiac 'nang òi ti ìh, ma ùh joq?”

⁴⁹ Chuaq Jêxu doi: “Au ùh i ca can kiac leq, mahaq Au padèch dèh Baq Au mahaq pì jù lê Au. ⁵⁰ Cla Au ùh chaq biac 'ngah 'ngai ca dađeh. Baq Au chaq biac 'ngah 'ngai am ca Au wa cla Haq chaq wa broq rìm biac am Au. ⁵¹ Joq 'nàng, joq 'nàng, Au doi ca pì: Tàng mangai leq wèq cajap bàu Au, haq ùh jò leq cachit.”

⁵² Mangai Yothaiq doi: “Manàiq cô nhèn hnoq ro joq 'nàng i kiac òi ti ìh. Ap-ra-ham khoi cachit. Wì mangai

capoch thai da Boc Plình hadai khoi cachit, mahaq ìh doi: Tàng mangai leq wèq cajap bàu Au, ùh jò leq cachit 'mòh? ⁵³ ìh broq cân yi hnao ca boc nhèn Ap-ra-ham wa 'bài mangai capoch thai da Boc Plình ma khoi cachit 'mòh? ìh xoh dađeh cabô?”

⁵⁴ Chuaq Jêxu doi: “Tàng Au padèch dađeh, can 'ngah 'ngai aih ùh loh cleq. Mahaq cla Baq Au padèch Au. Aih Haq pì ma xôq creo Boc Plình da pì, ⁵⁵ mahaq pì ùh loq ca Haq, mahaq Au loq ca Haq. Tàng Au doi: Au ùh loq ca Haq, Au broq mangai capoch amòng tìah ca pì, mahaq Au loq ca Haq wa iu tiaq bàu Haq. ⁵⁶ Boc pì, Ap-ra-ham bùi gòm ngèh jah hnoq hì da Au. Haq khoi hnoq hi lem bùi òiq jaq!”

⁵⁷ Wì mangai Yothaiq doi ca Haq: “Ìh 'nhòq trùh 50 hanam, hagleq ìh khoi hnoq Ap-ra-ham?”

⁵⁸ Chuaq Jêxu doi: “Jòq 'nàng, jòq 'nàng, Au doi ca pì: Adroi ca jò 'nhòq i Ap-ra-ham, Au, khoi i Au.” ⁵⁹ Wì tóch hmu padon tèm jêh cađac Haq, mahaq Chuaq Jêxu lam hlèp, loh khoi enh Hnem Cùh Waiq.

9

Mangai Ùh Xau Jah Brêh

¹ Jò Chuaq Jêxu lam ti trong, Haq hnoq mòiq ngai ùh xau mat enh jò xa-ông. ² Wì mangai hõc tiaq bòch Haq: “Thài, cabô khoi broq tôiq, mangai cô, loq miq baq haq ma broq ca haq ùh xau mat 'màng cô?”

³ Chuaq Jêxu doi: “Ùh xài wì broq tôiq, mangai cô loq miq baq haq, mahaq khoi xa-ông haq ùh xau mat waq ca mahno biác Boc Plình òi ti haq. ⁴ Jò xôq òi dahì, bèn phai broq biác Boc Plình, Haq ma khoi thê Au trùh, taiq jò damang trùh, ùh i ca mangai jah broq hòm. ⁵ Jò Au xôq

õi ta crõng taneh, Au Can 'Ngha ca con mangai õi crõng taneh.”

⁶ Jò haq khai doi bàu cô gêh, Haq cachôh ta taneh, yõc tráp xùt ta mat mangai ùh xau, ⁷ hi doi ca haq: “Lam beq, 'nheo ta 'bau diac Si-lô-am!” Si-lô-am, aih i hiniq: “Jah Thê Lam”. 'Màng aih, haq lam trùh 'bau aih, 'nheo. Hi khai, haq hlài, èh haq jah hnoq.

⁸ Wì mangai haten hatia haq wa wì mangai adroi cô nèh hnoq haq axin, doi: “Cô i joq mangai ma axin adroi cô nèh 'mòh?” ⁹ 'Nah ngai wì doi: “Hi loq ca haq raq.”

I ngai doi: “Ùh xài, mòiq ngai 'noi q tìah ca haq.”

Mangai ùh xau doi: “Au cô raq.”

¹⁰ Wì bòch haq: “Broq 'màng leq mat ìh ma jah xau hnoq?”

¹¹ Haq padreo bàu doi: “I Mangai hiniq Haq Chuaq Jêxu, broq tráp xùt ta mat au, wa doi: Lam trùh 'bau Si-lô-am 'nheo beq! 'Màng aih, au lam trùh 'nheo ti aih, khai èh au jah hnoq.”

¹² Wì bòch: “Mangai aih ta leq?”

Haq doi: “Au ùh 'nì.”

¹³ Wì 'ràng mangai ma adroi khai ùh xau mat aih, trùh ti wì Pha-ri-si. ¹⁴ Hì Chuaq Jêxu ma broq tráp xùt ta mat mangai cô jah hnoq, aih hì Sabat. ¹⁵ Mangai Pha-ri-si bòch hòm haq: “'Màng leq ìh ma jah hnoq?” Haq doi: “Mangai aih xùt tráp ti mat au, au 'nheo, manàiq au jah hnoq.”

¹⁶ I wì õi ta mangai Pha-ri-si doi: “Mangai cô ùh xài loh enh Boc Plinh. Ma jah 'màng aih Haq ùh tiaq ranenh hì Sabat.”

Mahaq i wì ma 'noi q doi: “Mangai dù broq 'màng leq ma jah broq bìac halac?” Khai èh wì axong tajraq hlài ca dabau.

¹⁷ Wì doi ca mangai ùh xau mat mòiq yàng hòm: “Mangai ma broq brêh ca ìh, ìh doi Haq cabô?”

Haq tèo: “Haq mangai capoch thai Boc Plình.”

¹⁸ Mahaq wì mangai Yothaiq ùh lùì mangai aih adroi ùh xau mat, manàiq jah xau hnoq, trùh jò wì creo ca miq baq haq trùh ti wì. ¹⁹ Wì bòch wa: “Cô i joq con calô chòp ma khoi ùh xau mat enh jò xa-ông ùh? Manàiq cô broq 'màng leq haq ma jah xau hnoq?”

²⁰ Miq baq haq doi: “Ma loq cô con calô ma. Haq khoi ùh xau mat enh jò xa-ông, ²¹ mahaq manàiq cô, 'màng leq haq jah xau hnoq, ma ji ùh 'nì. Cabô broq mat haq jah xau hnoq ma ji ùh 'nì. Pì bòch haq beq. Cla haq jah anoi hlài taiq haq khoi càn.” ²² Miq baq haq doi 'màng aih taiq wa yùq crè ca mangai Yothaiq taiq wì khoi doi: “Tàng i mangai leq doi Chuaq Jêxu, Haq Crich, wì hnan cađac haq loh enh gùng ca hnem tagop.” ²³ Taiq nen aih, miq baq haq ma khoi doi: “Pì bòch haq beq, haq ùh xài con 'yoh!”

²⁴ Mòiq yàng hòm, wì mangai Pha-ri-si creo ca mangai adroi ma ùh xau mat, doi ca haq: “Manàiq cô ìh manè pôi Boc Plình beq. Nhèn loq Mangai aih, Haq Mangai tòi q lôi.”

²⁵ Haq padreo hlài bàu tèo wì: “Au ùh 'nì haq i joq mangai i tòi q loq ùh, mahaq i mòiq bìac au ma loq joq 'nàng. Adroi au ùh xau mat, manàiq cô au khoi jah xau hnoq.”

²⁶ Wì bòch hòm haq: “Haq broq 'màng leq ma brêh ca mat ìh?”

²⁷ Haq tèo: “Au khoi doi ca pì adroi, pì ùh chiùq tamàng. Gleq ma jah waq ca tàng tam hòm? Pì enh chaq trong broq mangai hỏc tiaq Haq 'mòh?”

²⁸ Wì lech hanip haq doi: “'Màng aih, ìh mangai hỏc tiaq Haq. Nhèn mangai hỏc tiaq Môise. ²⁹ Nhèn loq Boc Plình khoi doi ca Môise, mahaq Mangai aih nhèn ùh 'nì Haq loh enh leq.”

³⁰ Mangai ùh xau padreo hlài bàu doi: “Au hamàih ta manoh! Mangai cô broq brêh ca mat au, mahaq pì ùh 'nì

Haq loh enh leq! Aih joq halac halùai! ³¹Bèn loq, Boc Plình ùh tamàng wì mangai i tôiq, mahaq mangai ma leq cùh waiq Haq wa broq tiaq bàu Haq, Haq tamàng. ³²Enh calah trùh manàiq, ùh lah tàng i mangai leq ma broq brêh ca mangai ùh xau mat enh jò xa-ông ca haq. ³³Tàng Mangai cô ùh loh enh Boc Plình, Haq ùh jah broq bìac cleq.”

³⁴Wì lech ca Haq: “Ìh joq 'nàng mangai bình tôiq lôì enh jò xa-ông, mahaq ìh enh hnài nhèn 'mòh?” Khoi ca aih, wì hnan cađac haq loh enh gùng ca hnem tagop.

³⁵Chuaq Jêxu tàng wì khoi hnan cađac haq loh enh gùng, èh jò chaq hnoq haq, hi bòch: “Ìh i manoh lùì canòm Con Mangai ùh?”

³⁶Haq tèo: “Thài ôi, Con Mangai aih cabô ðòiq Au lùì Haq?”

³⁷Chuaq Jêxu doi: “Ìh khoi hnoq Haq. Manàiq cô Haq 'nang capoch tùang ca ìh.”

³⁸Haq doi: “Waiq Chuaq, au lùì ìh.” Hi khoi, haq cùh waiq Chuaq Jêxu.

³⁹Chuaq Jêxu doi: “Au trùh ðòiq hadrah crống taneh cô ðòiq broq mangai ma ùh xau mat jah xau hnoq, mangai xau hnoq wìa mangai ùh xau mat.”

⁴⁰'Bài mangai Pha-ri-si ôi ta aih tàng bàu aih. Tajòì 'mòì wì bòch: “Ìh doi ðìq ca nhèn cô hadai ùh xau 'mòh?”

⁴¹Chuaq Jêxu doi: “Tàng pì mangai xau, èh pì ùh i ca tôiq cleq, mahaq taiq pì doi: Nhèn mangai ma hnoq, tôiq pì xôq ôi raq.”

10

Mangai Ban Trù Lem Lình

¹“Au doi ca pì bàu joq 'nàng; Mangai leq mùt ta cadrong trùu, ùh mùt trong 'mang, mahaq heo trong 'noi, mangai aih mangai atùng. ²Mahaq mangai mùt ti 'mang ngo, haq

mangai ban trùu. ³ Mangai gòm 'mang ngo pèh 'mang am ca haq wa trùu canao ca bàu haq. Haq creo hiniq tang toq trùu haq, 'nong trùu loh enh gùng. ⁴ Jò haq khoi 'nong trùu loh enh gùng, haq lam adroi wa trùu tiaq haq taiq trùu canao ca bàu haq. ⁵ Trùu ùh tiaq mangai ùh canao, mahaq trùu cadàu mot, taiq trùu ùh canao ca bàu mangai ùh canao.” ⁶ Chuaq Jêxu capoch bàu cô, mahaq wì ùh 'nì tàng Haq enh doi cleq.

⁷ Chuaq Jêxu doi hòmm ca wì: “Jòq 'nàng, jòq 'nàng, Au anoi ca pì: Au cô raq 'mang da trùu. ⁸ Dìq dõng wì ma trùh adroi ca Au, wì aih mangai atùng, 'màng aih trùu ùh tàng dì tiaq wì? ⁹ Au cô 'mang, mangai leq mùt 'mang Au, haq jah dèch. Mangai aih jah mùt loh glàm nhat. ¹⁰ Mangai atùng trùh òiq atùng, jêh wa raliang đac. Au trùh waq ca trùu jah i can rìh, aih can rìh jòq 'nàng.

¹¹ “Au cô Mangai ban trùu lem linh. Mangai ban trùu lem linh cađac dèh can rìh waq ca trùu jah rìh. ¹² Mahaq mangai caq cùng, ùh xài mangai ban trùu, wa trùu aih ùh xài trùu haq, jò haq cô hnoq coq brì trùh, haq hi cađac trùu cadàu hloi. Coq brì rùp cap caq trùu wa hnan wì loh tac mac. ¹³ Ma jah 'màng aih haq mangai ban trùu caq cùng, 'màng aih haq ùh hèm trùh ca trùu.

¹⁴ “Au cô Mangai ban trùu lem linh. Au canao ca trùu Au, trùu Au canao ca Au. ¹⁵ 'Màng ca Baq loq ca Au, Au loq ca Baq. Au cađac dèh can rìh òiq dèch dèh trùu. ¹⁶ Òi i trùu ma 'noi q hòmm, ùh òi ta calùh cô. Au phai 'ràng wì hadai jah hlài òiq. Trùu aih jah tàng bàu Au, 'màng aih, jah i mòiq calùh trùu wa mòiq Ngai ban. ¹⁷ Baq loq waq ca Au taiq Au cađac dèh can rìh òiq jah yõc hlài. ¹⁸ Òi i ca cabô jah yõc can rìh Au, mahaq taiq cla Au to am. Au i cwàng cađac dèh can rìh, wa i cwàng yõc hlài. Baq Au khoi thê 'màng aih.”

¹⁹ Wì mangai Yothaiq axong ca dabau taiq Haq capoch bàu aih. ²⁰ I bàc ngai doi: “Haq i can kiac òi ti Haq, Haq loh ca ranhù. Gleq pì ma tamàng Haq?”

²¹ Wì ma 'noi q doi: “'Màng aih, ùh xài bàu capoch da mangai i kiac òi ti haq. 'Màng leq can kiac ma jah broq brêh ca mangai ùh xau mat?”

Lè Broq Hadròih Hnem Cùh Waiq

²² Wop jò aih ta phòq Jê-ru-sa-lem i lè Broq Hadròih Hnem Cùh Waiq. Aih jò ralim òi ta Jê-ru-sa-lem. ²³ Chuaq Jêxu lam ba'yàt ta Hnem Cùh Waiq enh ca'nàm pra Sa-lô-môn. ²⁴ Wì mangai Yothaiq yòng wawenh ca Haq bòch Haq: “Ìh broq ca nhèn chiuq hèm ta manoh ùh ro trùh jò leq? Tàng ìh joq Crich, phai doi ca nhèn ma ro.”

²⁵ Chuaq Jêxu tèo wì: “Au khoi doi ca pì adroi, mahaq pì ùh lùì Au! Dìq ca bìac halac ma Au broq canòm hiniq Baq Au, aih bìac patô Au cabô. ²⁶ Mahaq pì ùh lùì Au, taiq pì ùh xài trùu Au. ²⁷ Trùu Au tamàng bàu Au wa Au loq ca wì haq wa wì haq tiaq Au. ²⁸ Au am ca wì can rìh hloi hloi, èh wì ùh hnhung; ùh i mangai leq jah atùng yõc wì khoi enh tì Au. ²⁹ Baq Au ma khoi am trùu aih ca Au, Haq ma yi càn dõng; ùh i cabô jah yõc atùng trùu aih khoi enh tì Baq Au. ³⁰ Au wa Baq Au khoi mòiq.”

³¹ Mòiq yàng hòm wì mangai Yothaiq yõc hmu padon tèm jêh cađac Haq. ³² Chuaq Jêxu doi: “Nhò Baq Au, Au khoi broq bìac lem bàc enh ngĩa ca pì. I bìac ma leq ma broq pì chaq trong tèm hmu jêh cađac Au?”

³³ Wì mangai Yothaiq padreo hlài bàu doi: “Aih ùh xài taiq ìh broq bìac lem ma nhèn enh tèm hmu ìh, mahaq taiq ìh capoch bàu ha'nhèq ðùng trùh Boc Plình. ìh mangai, mahaq ìh doi dađeh Boc Plình.”

³⁴ Chuaq Jêxu tèo: “Khoi achìh ta ranenh da pì: ‘Au doi: cla pì 'bài yang, ajoq?’”[☆] ³⁵ Tàng Haq creo wì haq ma jah bàu Boc Plình ma anoi trùh: Wì 'bài yang, wa tàng Sech Hadròih ùh jah cađac, ³⁶ èh Au cô, ma Baq khoi ràih loh hadròih thê trùh ta crông taneh, toq doi: ‘Au cô Con Boc Plình, gleg pì ma jah kian Au doi, Au capoch 'mèq ca Boc Plình’? ³⁷ Tàng Au ùh broq biac da Baq Au, pì paq lùì Au, ³⁸ mahaq tàng Au broq biac Baq Au, 'nhac ca pì ùh lùì Au, pì phai lùì biac halac Au ma broq beq, òiq pì loq Baq òi enh dalam ca Au, Au òi enh dalam ca Baq.” ³⁹ Wì xôq chaq trong rùp Haq, mahaq Haq claih khoi ca tì wì.

⁴⁰ Haq cwa pah tau cròng diac Jôđan, mùt ta nòi Jon ma baxèm broq 'baptem. Haq òi ta aih. ⁴¹ Wì bàc ngai trùh ti Haq. Wì doi ca dabau: “Jon ùh lah broq teo halac cleq, mahaq rìm nà Jon anoi hlài biac Mangai cô, haq capoch òiq troq đống.” ⁴² Òi ta nòi aih i bàc ngai lùì Haq.

11

Biac La-xa-ru Cachit hi Rih Hlài

¹ I mòiq ngai hiniq haq La-xa-ru òi ta gùng 'Bê-tha-ni, plài da baiq ngai oh daq Mari wa Mathê. ² Aih Mari ùc dầu xua thùm ca Chuaq Jêxu, haq yóc xác gàu haq xùt jènh Chuaq Jêxu. Daq haq La-xa-ru, ùh hróc. ³ Màng aih, wa oh daq baiq ngai thê mangai lam doi ca Chuaq Jêxu: “Chuaq òi, mangai ìh ma loq waq ca haq, haq ùh hróc.”

⁴ Jò Chuaq Jêxu tàng bàu cô, Haq doi: “Haq ùh hróc 'màng cô ùh hìaq cachit òh, mahaq biac aih waq ca Boc Plình jah 'ngah 'ngai lem lình, wa Con Haq nhò aih hadai jah lem lình 'ngah 'ngai.” ⁵ Chuaq Jêxu loq waq ca Mathê, Mari wa La-xa-ru. ⁶ Jò Haq tàng wì doi La-xa-ru ùh hróc, Haq òi tam nòi Haq ma 'nang òi aih baiq hì hòm. ⁷ Hì khoi

☆ 10:34 10:34 BCP 82:6.

Haq doi ca wì mangai hõc tiaq Haq: “Beq bèn hlài ta gùng Judia.”

⁸ Wì mangai hõc tiaq doi: “Thài ôi! Wì mangai Yothaiq neo adroi cô chaq trong tèm hmu jêh cađac ìh. Manàiq, gleq ìh ma waq ca hlài ta aih hòm?”

⁹ Chuaq Jêxu doi: “Dahì i 12 jò, joq ùh? Tàng i mangai lam dahì, haq ùh catõih cro, taiq haq jah hnoq can 'ngah da crõng taneh cô. ¹⁰ Mahaq tàng haq lam damang, haq jah catõih cro taiq ùh i ca can 'ngah.”

¹¹ Hi khoi Haq doi hòm: “La-xa-ru bua bèn 'nang cùi, mahaq Au padon lam padriù haq rìu.”

¹² Wì mangai hõc tiaq Haq doi: “Chuaq ôi! Tàng haq cùi, haq jah brêh.” ¹³ Mahaq Chuaq Jêxu enh doi: “Haq cùi aih, haq cachit.” Wì xoh dèh Haq doi La-xa-ru cùi joq 'nàng.

¹⁴ 'Màng aih Chuaq Jêxu doi ro ca wì: “La-xa-ru khoi cachit. ¹⁵ Mahaq taiq pì, Au bùi Au ùh õi ta aih òiđiq pì lùì. Mahaq bèn lam ti haq beq.”

¹⁶ Thôma, (hadai i hiniq: Con Camia), doi ca wì mangai hõc tiaq: “Bèn lam beq! Tàng bèn cachit èh, òiđiq ca bèn hadai cachit pajùm ca Chuaq Jêxu.”

¹⁷ Jò Chuaq Jêxu lam trùh nòi, Haq hnoq wì catùh La-xa-ru õi ta ralùng xam hmu khoi pôn hì! ¹⁸ 'Bê-tha-ni cadan ca Jê-ru-sa-lem, piq kê sôq. ¹⁹ I bàc ngai Yothaiq khoi lam hmàih ca Mari wa Mathê òiđiq alòng wa haq bìac daq wa cachit. ²⁰ Jò Mathê tàng wì doi, Chuaq Jêxu trùh, Mathê loh òiđi Haq. Mari ha'ngui ta hnem.

²¹ Mathê doi ca Chuaq Jêxu: “Chuaq ôi! Tàng ìh khoi õi ta cô hì adroi, daq au ùh cachit! ²² Manàiq cô au loq, Boc Plinh xôq am ca ìh bìac cleq ìh xìn Haq.”

²³ Chuaq Jêxu doi ca haq: “Daq ìh jah rìh hlài.”

²⁴ Mathê doi: “Au loq, hì ma atìq lùch jò wì òiđiq òiđing rìh hlài, daq au hadai rìh hlài.”

²⁵ Chuaq Jêxu doi ca haq: “Au cô can rìh hlài wa can rìh. Mangai leq ma lùì Au, 'nhac ca khoi cachit, haq xôq jah rìh. ²⁶ Mangai leq rìh, haq lùì Au, èh ùh hìa q cachit. Ìh lùì bìac aih ùh?”

²⁷ Haq doi ca Chuaq: “Jòq, Chuaq, Au lùì ìh Crich, Con Boc Plình, Haq ma phai trùh crõng taneh.”

²⁸ Doi hì gêh, Mathê hlài, bahech ca Mari: “Thài khoi trùh òi jang tau. Haq creò ca oh lam atau.” ²⁹ Jò Mari tàng bàu cô, haq yòng 'mòì ca renh lam trùh ti Haq. ³⁰ Jò aih, Chuaq Jêxu 'nhòq mùt ta plài. Haq xôq òi ta nòì ma Mathê khoi glàm Haq. ³¹ Jò wì mangai Yothaiq ma ha'ngui ti Mari òi ta hnem alòng haq, wì hnoq Mari yòng renh loh enh gùng, wì xoh dèh haq lam hmoi dèh ca daq. Wì lam tiaq haq.

³² Mari trùh ta nòì Chuaq Jêxu òi. Jò hnoq Haq, Mari hacùn cràng ta taneh ajènh Haq. Mari doi: “Chuaq òi, tàng ì ìh òi ta cô, daq au ùh cachit!”

³³ Jò Chuaq Jêxu hnoq Mari hmoi wa mangai Yothaiq lam tiaq Mari hadai hmoi, Haq ua-ac ta manoh, xa-öch diq jaq. ³⁴ Haq bòch: “Pì khoi òi ti leq?”

Wì doi: “Lam ta cô, Chuaq jah hnoq.”

³⁵ Chuaq Jêxu hmoi.

³⁶ Wì mangai Yothaiq doi: “Ngan tau, Haq loq waq ca La-xa-ru dàng leq.”

³⁷ Mahaq 'nah ngai doi: “Haq ma khoi broq ca mangai ùh xau mat jah hnoq, Haq ma ùh jah broq ca mangai cô jah rìh hlài 'mòh?”

³⁸ Yàng cô Chuaq Jêxu ua-ac manoh hòm, lam trùh ti còp hmu. I hmu càn òi gùp jang trom 'ngah ralùng.

³⁹ Chuaq Jêxu doi: “Cadro hmu beq!”

Mathê, oh mangai ma khoi cachit doi: “Thài òi, manàiq cô hanang khoi xua. Haq cachit khoi pôn hì!”

⁴⁰ Chuaq Jêxu doi ca haq: “Au khoi doi ca ìh, tàng ìh lùì Au, ìh jah hnoq bìac 'ngah 'ngai da Boc Plình 'mòh?”

⁴¹ Khoi ca aih wì cadre hmu. Chuaq Jêxu ngoi ta plình, Haq doi: “Baq ôi, Con manè ìh, ma jah 'màng aih ìh khoi tàng bàu Con. ⁴² Au loq ìh yôt yôt tamàng Au, mahaq Au doi 'màng cô, waq ca wì ma 'nang yòng jang cô jah lùì ìh thê Au trùh ta cô.”

⁴³ Jò Haq anoi khoi gêh, Haq creo bàu dêh: “Ô La-xa-ru, loh enh gùng beq!” ⁴⁴ Mangai khoi cachìt loh enh gùng. Tì jènh haq càt xam bai xom, hadrò haq xôq ôi tù mù.

Chuaq Jêxu doi: “Dõih da haq òi q haq hi lam!”

⁴⁵ I bàc mangai Yothaiq ma khoi ôi ti Mari, jò wì hnoq Chuaq Jêxu broq bìac cô, wì lùì Chuaq Jêxu. ⁴⁶ Mahaq i toq 'biaq ngai lam trùh ta wì Pha-ri-si, anoi hlài ca wì bìac Chuaq Jêxu ma khoi broq. ⁴⁷ 'Màng cô wì pajàu càn wa mangai Pha-ri-si, tagop ti 'bài cra q hadrah ha'nhèq.

Wì doi: “Bèn phai broq cleq, ma jah 'màng aih mangai cô broq teo halac bàc? ⁴⁸ Tàng bèn òi q ca Haq ôi aiq, wì òi q òi q jah lùì Haq, khoi èh lình mangai Rôma ta'miaq yóc da bèn Hnem Cùh Waiq, wa gùng bèn.”

⁴⁹ Ôi ti wì, i mòiq ngai hiniq haq Caiphe, pajàu ha'nhèq hanam aih, doi: “Pì ùh 'nì loq leq! ⁵⁰ Gleq pì hèm ma ùh loh, tàng i mòiq ngai cachìt thai òi q ca jàn, aih yi hnao òi q òi q òi q ca jàn bèn raliang cađac.”

⁵¹ Ùh xài bàu cla Haq capoch 'màng aih, mahaq taiq nen haq broq pajàu ha'nhèq hanam aih, haq capoch bàu loq adroi ca bìac Chuaq Jêxu padon cachìt thai ca jàn Yothaiq. ⁵² Ùh xài toq mangai Diac cô, mahaq waq ca jah 'ràng wì con caiq Boc Plình broq mòiq pajùm ca 'bài con caiq da Boc Plình ma khoi pac lac. ⁵³ Pàng hì aih ta èh, wì chaq trong jêh cađac Chuaq Jêxu.

⁵⁴ Pàng aih, Chuaq Jêxu ùh jah lam hlài ro rang enh ngìa ca wì mangai Yothaiq hòim. Haq cađac nòi aih, mùt hlep òi ta phòq Ep-ra-im, haten ca nòi ðùng hawit, pajùm ca wì mangai hóc tiaq Haq.

⁵⁵ Jò aih, Lè Lam Cwa Yothaiq ten trùh. I bàc ngai loh enh bàc gùng, lam ta Jê-ru-sa-lem adroi ca hì lè, padon dađeh broq mangai hadròih enh ngìa ca Chuaq. ⁵⁶ Wì chaq Chuaq Jêxu, bòch dabau jò wì yòng òi ta Hnem Cùh Waiq: “Pì hèm 'màng leq? Haq ùh trùh ta lè cô joq ùh?” ⁵⁷ Wì pajàu càn wa mangai Pha-ri-si khoi ca'naih bàu: Mangai ma leq loq ca Chuaq Jêxu òi ta leq, thê doi ca wì, waq ca wì jah rùp càt Haq.

12

Mari Yóc Dàu Thùm Xùt Jènh Haq (Mat 26:6–13; Mốc 14:3–9)

¹ Tadràu hì adroi ca Lè Lam Cwa, Chuaq Jêxu trùh 'Bê-tha-ni, aih nòi La-xa-ru, mangai ma khoi cachit ma Chuaq Jêxu broq haq rìh hlài. ² Wì padon ca Chuaq Jêxu caq hiniang ta aih. Mathê patih ca wì wa La-xa-ru pajùm 'bài mangai 'noi q ha'ngui caq ôq pajùm ta ca'bống ti Chuaq Jêxu. ³ Jò cô, Mari yóc mòiq 'ne kìq jreo xua thùm canaq ðìq jaq, ùc ta jènh Chuaq Jêxu. Khoi ca aih, haq yóc dèh xác xùt jènh Chuaq. ðìq ca hnem jah xua jreo cô.

⁴ Mahaq Juda Ich-ca-ri-ôt, mangai hóc tiaq, atìq haq blòq Chuaq, doi: ⁵ “Gleq ma ùh tech jreo xua thùm cô jah 300 ðùng ðê-na-ri ðòiq am ca mangai pa?” ⁶ Haq doi 'màng aih, ùh xài haq hèm trùh wa xa-öch ca mangai pa, mahaq haq mangai atùng. Haq wèq caxop 'bac wì, èh haq yóc atùng 'nah 'bac aih.

⁷ Mahaq Chuaq Jêxu doi: “Đòiq da haq beq. Haq khoi wèq jreo cô ca hì xùt catùh Au! ⁸ Ma jah 'màng aih pì jò leq xôq i mangai pa òi ta pì, ☆ mahaq Au ùh òi hloi ta pì.”

⁹ I bàc ngai Yotheiq tàng wì doi, Chuaq Jêxu òi ta 'Bê-tha-ni. Wì lam trùh, ùh xài wì chaq hnoq Chuaq Jêxu hêq, mahaq wì hadai waq ca hnoq La-xa-ru, mangai Chuaq Jêxu khoi broq haq rìh hlài. ¹⁰ Mahaq 'bài pajàu càn hatình ca dabau, hadai chaq trong jêh cađac La-xa-ru, ¹¹ taiq La-xa-ru, bàc ngai Yotheiq khoi cađac wì haq, èh lùì tiaq Chuaq Jêxu.

Wì Đìh Yóc Chuaq Jêxu Mùt Jê-ru-sa-lem

¹² Loh hì atìq, hì tìn Chuaq Jêxu hadai tóç Jê-ru-sa-lem. Wì mangai pajùm bàc lam caq Lè Lam Cwa, ¹³ wê acòng rêq lam đìh Chuaq Jêxu. Wì cachech dèh bàu doi: “Hô-sa-na!”

“Am xôq ramót ca Haq ma canòm ca hiniq Chuaq lam trùh, ☆ aih Bùa jàn Is-ra-ên!”

¹⁴ Chaq hnoq mòiq toq con lùa, Haq còi lùa aih, 'màng ca Sech Hadròih khoi achìh:

¹⁵ “Ô mangai Siôn, apaq crè hòm.

Bùa ìh còi lùa con 'nang lam trùh.” ☆

¹⁶ Jò baxèm, 'bài mangai hóc tiaq Haq ùh 'nì tàng bìac cô, mahaq jò Chuaq Jêxu khoi jah 'ngah 'ngai lem lình, khoi èh, wì hmàng hlài brong Sech Hadròih khoi i achìh bìac Haq. Wì hnoq joq khoi xit ca Haq.

¹⁷ Wì ma khoi òi ti Chuaq Jêxu jò Haq creò La-xa-ru loh enh ralùng hanang broq haq rìh hlài, xôq anoi yôt bìac cô. ¹⁸ Jò cô wì mangai pajùm loh enh phòq đìh Haq, taiq wì khoi tàng bàu anoi hlài, Chuaq Jêxu khoi broq teo halac aih. ¹⁹ Mahaq wì mangai Pha-ri-si capoch tùang ca dabau

☆ 12:8 12:8 RAH 15:11. ☆ 12:13 12:13 BCP 118:25,26. ☆ 12:15 12:15 Xach 9:9.

doi: “Hnoq ùh? Bèn ùh broq jah cacleq! Dìq dǒng ca phù cròng khoi lam tiaq Haq!”

Chuaq Anoi Adroi Bìac Haq Cachit

²⁰ Ta'nàih ca lè cô, hadai i 'bài mangai Hilap lam ti wì tǒc ðoìq cùh waiq Boc Plình. ²¹ Wì lam glàm Philip, mangai phòq 'Bêt-sai-đa ǒi ta gùng Ga-li-lê, doi ca haq: “Ôi thài, nhèn enh hnoq Chuaq Jêxu.” ²² Philip lam doi ca Anrê, hi khoi wa baiq ngai, Anrê wa Philip lam doi ca Chuaq Jêxu.

²³ Chuaq Jêxu padreo bàu doi: “Khoi trùh jò Con Mangai jah 'ngah 'ngai lem lìn. ²⁴ Au doi ca pì bàu joq 'nàng, jò rai adrech, tàng adrech cùh ta taneh ùh cachit, èh adrech aih mòiq pliang xòq ǒi dèh mòiq pliang, mahaq tàng cachit, èh men jah loh bàc. ²⁵ Mangai leq loq waq dèh ca can rìh dàdèh, èh jah hnhung. Mahaq mangai ma leq cađac dèh can rìh ǒi 'nhòng cô, èh jah wèq hlài ta 'nhòng rih hloi hloi. ²⁶ Tàng mangai ma leq patìh bìac Au, èh phai tiaq Au. Au ǒi ti leq, mangai ma patìh bìac Au hadai ǒi ti aih. Mangai ma leq patìh bìac Au, èh Baq Au jah padèch haq.

²⁷ “Manàiq cô manoh Au mango ðìq jaq. Au phai doi cleq? Waiq Baq, xin dèch Au khoi ca jò nan xa cô 'mòh? Mahaq taiq nen jò cô raq Au khoi trùh ta cô! ²⁸ Baq ôi, xin broq 'ngah 'ngai hiniq ìh!”

Jò aih i bàu enh plìn doi: “Au khoi broq 'ngah 'ngai hiniq Au, wa Au jah broq 'ngah 'ngai hiniq Au hòm!” ²⁹ Mangai jàn ma yòng haten tàng bàu cô, doi: “Plìn hilùng.” Wì ma 'noi doi: “I mòiq 'bình plìn capoch tàng ca Haq.”

³⁰ Chuaq Jêxu padreo hlài bàu doi: “Bàu cô loh enh plìn, ùh xài waq ca Au tàng, mahaq waq ca pì tàng. ³¹ Crǒng taneh cô khoi trùh jò hadrah. Manàiq jah hnan cađac kiac Satan, aih haq ma wèq crǒng taneh cô. ³² Khoi èh, Au cô, jò chac Au khoi 'bìq atua tǒc khoi ca taneh, Au

jah creo ðiq ca mangai trùh ti Au.”³³ Haq doi bàu cô waq ca wì loq, èh Haq chiuq cachit 'màng leq.

³⁴ Wì padreo hlài bàu doi ca Haq: “Nhèn i tàng sech Ranenh khoi hnài doi: Chuaq Jêxu Crich òi i hloi hloi. Gleq ìh ma jah doi: ‘Con Mangai phai 'bìq atua tồc’? Con Mangai aih cabô?”

³⁵ Chuaq Jêxu doi ca wì: “Can 'Nghah òi xreo ta'ne ca pì toq 'biaq hòmh! Cadiang lam beq jò pì òi i Can 'Nghah, yùq can clam loh renh trùh traiq ti pì! Mangai lam ta nòi clam clòiq ùh 'nì ðađeh lam ta leq. ³⁶ Jò pì òi i Can 'Nghah, pì phai lùì Can 'Nghah, waq ca pì jah broq con caiq Can 'Nghah.” Chuaq Jêxu doi bàu cô, hi khoi Haq lam ta nòi hlèp hangai ca wì.

Bìac Mangai Yothaiq Ùh Lùì Chuaq

³⁷ 'Nhac ca Haq khoi broq bàc teo halac enh ngìa ca wì, mahaq xôq wì ùh lùì Haq, ³⁸ ðòiq bàu Êsai, mangai capoch thai Boc Plình, jah xit:

“Waiq Chuaq, cabô ma khoi lùì bàu nhèn anoi hlài?

Wa capiang tì Chuaq khoi patô 'noh ca cabô?”[☆]

³⁹ Wì ùh jah lùì haq, taiq nen tìah ca Êsai khoi doi:

⁴⁰ “Haq khoi broq wì ùh xau mat,

broq manoh wì cadoq,

ðòiq i mat mahaq wì ùh xau hnoq,

i manoh, mahaq wì ùh 'nì tàng;

ùh wìh wìa trùh ti Au, waq ca Au broq brêh ca wì.”[☆]

⁴¹ Êsai doi bàu cô jò haq khoi hnoq bìac 'ngah 'ngai da Chuaq wa anoi hlài bìac Haq.

⁴² Mahaq, òi ta wì ma broq cwan, i bàc ngai lùì Chuaq Jêxu; mahaq taiq wì yùq ca mangai Pha-ri-si loq hnan wì loh khoi enh hnem tagop, wì ma jah ùh anoi pa'noh ðađeh

[☆] 12:38 12:38 Êsai 53:1. [☆] 12:40 12:40 Êsai 6:10.

tiaq Chuaq, ⁴³ taiq wì haq enh broq lem manoh da con mangai padèch, yi hnao ca broq lem manoh Boc Plình.

⁴⁴ Chuaq Jêxu capoch bàu dèh doi: “Mangai leq ma lùì Au, ùh xài toq lùì Au hêq, mahaq lùì Haq ma thê Au trùh ta cô. ⁴⁵ Mangai leq hnoq Au, haq hnoq Haq ma thê Au trùh.

⁴⁶ Au khoi trùh òòiq broq Can 'Nghah ta crõng taneh, waq ca mangai leq ma lùì Au, ùh òi ti clam clòiq hòmh.

⁴⁷ “Mahaq mangai leq tàng bàu Au mahaq ùh wèq bàu Au, èh ùh xài Au hadrah mangai aih, ma jah 'màng aih Au trùh ta cô, ùh xài òòiq hadrah crõng taneh, mahaq waq ca dèch rõt hlài crõng taneh. ⁴⁸ Mangai leq ma chòiq cađac Au wa ùh nhàn yõc bàu Au, èh khoi i biac jah hadrah haq; bàu Au ma khoi hnài jah hadrah wì ta hì ma atìq lùch. ⁴⁹ Ma jah 'màng aih, Au ùh i jò leq tiaq dèh manoh capoch, mahaq Baq, Haq ma khoi thê Au trùh, Haq ma thê Au capoch cleq wa doi 'màng leq. ⁵⁰ Au loq bàu thê Haq, aih can rìh hloi hloi. 'Màng cô, bàu ma Au capoch, aih bàu ma Baq Au thê Au phai doi.”

13

Chuaq Jêxu 'Nheo Jènh Mangai Hõc Tiaq

¹ Adroi ca hì Lè Lam Cwa, Chuaq Jêxu khoi loq ten trùh jò Haq cađac crõng taneh cô òòiq hlài dèh ta Baq. Haq khoi loq waq ca mangai da Haq òi crõng taneh, èh haq loq waq trùh hì atìq lùch.

² Jò wì 'nang acaq daxèq, can kiac Satan broq ca manoh Juda Ich-ca-ri-òt con Simôn òòiq blòq Chuaq Jêxu. ³ Chuaq Jêxu loq, Baq khoi òòiq ta tì Haq rìm biac, ma jah 'màng aih Haq khoi trùh enh Boc Plình wa Haq ten hlài ta Boc Plình, ⁴ Haq yòng, lèh dèh eo enh gùng, cật mù jang ca'nam, ⁵ khoi èh, Haq ùc diac ta khai, hi khoi Haq 'nheo jènh dèh ca 'bài mangai hõc tiaq Haq. 'Nheo hi gêh, Haq yõc dèh mù ma cật ti ca'nam, hi xùt.

⁶ Jò Haq trùh ti Simôn Pêtrô, Pêtrô doi ca Haq: “Chuaq ôi! Ìh 'nheo jènh au 'mòh?”

⁷ Chuaq Jêxu doi ca Haq: “Biác Au ma broq manàiq, ìh ùh 'nì. Atìq cô èh ìh ma loq.”

⁸ Pêtrô padreo hlài bàu doi: “Ìh ùh jò leq jah 'nheo jènh au!”

Chuaq Jêxu doi ca haq: “Tàng Au ùh 'nheo jènh ìh, èh ìh ùh i ca phàn cleq ta Au.”

⁹ Simôn Pêtrô doi ca Haq: “Chuaq ôi, ìh ùh xài toq 'nheo jènh au hêq, mahaq 'nheo tì wa gàu au hadai!”

¹⁰ Chuaq Jêxu doi ca haq: “Mangai leq khoi hùm, òiq ca chac haq khoi hreo, 'màng aih toq nhet 'nheo jènh hêq. Mahaq ùh xài pì òiq ðõng khoi jah hreo.” ¹¹ Ma jah 'màng aih Haq loq cabô padon blòq Haq, ma jah Haq doi: “Ùh xài òiq ðõng ca pì khoi jah lem hreo.”

¹² Jò Haq khoi 'nheo òiq jènh wì, Haq caxùnh hlài dèh eo, ha'ngui ti wì haq, doi: “Pì aloq biác Au ma neo broq ca pì ùh? ¹³ Pì creó Au cô Thài wa Chuaq, aih joq troq taiq cla Au joq 'nàng 'màng aih. ¹⁴ Tàng Au Chuaq pì wa Thài pì, khoi 'nheo jènh pì, pì phai 'nheo jènh dabau. ¹⁵ Ma jah 'màng aih Au khoi broq dua ca pì waq ca pì broq tiaq tìah ca Au. ¹⁶ Joq 'nàng, joq 'nàng, Au doi ca pì, mangai hapõng ùh yi càn dèh ca craq haq, 'màng aih mangai lam akhen, ùh yi càn ca mangai ma thê haq lam. ¹⁷ Tàng pì loq ca biác cô wa broq tiaq, èh pì jah xôq.

¹⁸ “Ùh xài Au doi òiq ðõng ca pì. Au loq ro 'bài mangai Au ma khoi ràih, mahaq biác cô tiaq bàu Sech Hadròih ma achìh khoi jah xit: ‘Mangai caq 'benh Au, haq tawìh hlài blòq Au.’”

¹⁹ “Manàiq Au doi ca pì adroi, òòiq jò biác cô jah trùh, pì jah lùì cla Au cô joq Crich. ²⁰ Joq 'nàng Au doi ca pì: Cabô

đìh yõc mangai leq Au khoi thê, aih haq đìh yõc Au. Tàng cabô đìh yõc Au, aih haq đìh yõc Boc Plình ma khoi thê Au trùh ta cô.”

Chuaq Jêxu Anoi Adroi Bìac Juda Blòq Haq
(Mat 26:20-25; Mõc 14:17-21; Luc 22:21-23)

²¹ Chuaq Jêxu doi bầu cô gêh, mahua yiang Haq loh ca manhài. Haq doi ro: “Jòq 'nàng, jòq 'nàng, Au doi ca pì, i mòiq ngai ta pì jah blòq Au.”

²² Wì mangai hõc tiaq ngan dabau, ùh 'nì Haq doi cabô.

²³ Õi ta wì mangai hõc tiaq, i mòiq ngai Chuaq Jêxu ma loq waq ca haq. Jò aih haq ha'ngui haten ca Chuaq Jêxu.
²⁴ Màng cô, Simôn Pêtrô ngan haq, cùh gàu, thê haq bòch Chuaq Jêxu patô anoi aih cabô.

²⁵ Haq cachình dađeh ti rada Chuaq Jêxu hi bòch: “Chuaq ôi, cabô aih?”

²⁶ Chuaq Jêxu doi: “Aih mangai ma Au padon am ha'nech 'benh mì Au chùq ta diac hi am ca haq.” Khoi èh, Haq chùq ta diac mòiq ha'nech 'benh mì, am ca Juda con Simôn Ich-ca-ri-ôt. ²⁷ Wop jò Juda nhàn ha'nech cô, kiac Satan mùt hloi ta manoh haq.

Chuaq Jêxu doi ca haq: “Bìac ma ìh broq, broq ma renh beq.” ²⁸ Mahaq ùh i ca cabô òi ta ca'bõng acaq loq hagleq Chuaq ma doi 'màng aih. ²⁹ Ma jah 'màng aih, taiq Juda mangai wèq 'bac, wì xoh đeh Chuaq Jêxu thê haq rõt dahwèq caq ca hì lè, loq yõc 'bac am ca wì mangai pa.
³⁰ Màng aih, Juda yõc khoi caq ha'nech 'benh mì cô, tajòì 'mòi haq loh enh gùng. Jò aih khoi clam.

³¹ Jò Juda khoi loh lam, Chuaq Jêxu doi: “Manàiq cô Con Mangai jah padèch ha'nhèq. Boc Plình hadai jah padèch ha'nhèq òi enh dalam ca Haq. ³² Tàng Boc Plình jah padèch ha'nhèq òi enh dalam ca Haq, èh Boc Plình jah

padèch Con Mangai òi enh dalam ca dađeh, èh Haq broq bìac aih tajòì 'mòi.

³³ “Ôi 'bài con, Au òi ti pì toq 'biaq hòm. Pì jah chaq Au, mahaq 'màng ca Au khoi doi ca wì mangai Yothaiq, manàiq Au hadai doi ca pì: Pì ùh jah lam ti nòi Au lam.

³⁴ “Au am ca pì bàu thê ma neo, aih pì phai loq waq ca dabau, 'màng ca Au khoi loq waq ca pì 'màng leq, pì hadai loq waq ca dabau 'màng aih. ³⁵ Tàng joq pì loq wa ca dabau, èh taiq bìac aih, phù cròng jah loq ca pì mangai hõc tiaq da Au.”

Chuaq Doi Adroi, Pêtrô Chôiq Haq

(Mat 26:31-35; Mõc 14:27-31; Luc 22:31-34)

³⁶ Simôn Pêtrô doi ca Haq: “Chuaq ôi, ìh lam ta leq?”

Chuaq Jêxu doi: “Au lam ta leq, ìh ùh jah tiaq Au manàiq, mahaq hì atiq ìh jah tiaq Au.”

³⁷ Pêtrô doi: “Chuaq òi, gleq manàiq Au ma ùh jah tiaq ìh? Taiq tiaq ìh Au hùà cachit!”

³⁸ Chuaq Jêxu doi: “Ìh hùà cachit taiq Au 'mòh? Joq 'nàng, Au doi ca ìh, ia 'nhòq rǒng, ìh hangah ùh loq ca Au piq yàng.”

14

Chuaq Jêxu Hùaq Am Yiang Hadròih

¹ “Manoh pì apaq hèm manhài. Pì khoi lùì Boc Plình, hadai phai lùì Au hòm. ² Òi ta hnem Baq Au, i bàc nòi òi. Tàng ùh 'màng aih, Au khoi doi ca pì. Au lam padon am ca pì nòi òi. ³ Jò Au khoi lam wa khoi padon am ca pì mòiđ nòi, Au wìh hlài 'ràng pì lam ti Au, waq ca Au òi ti leq, pì hadai òi ti aih. ⁴ Pì loq Au lam ta leq wa pì loq ca trong Au lam.”

⁵ Thôma doi ca Haq: “Chuaq ôi, nhèn ùh 'nì ìh lam ta leq, broq 'màng leq ma loq ca trong?”

⁶ Chuaq Jêxu doi ca haq: “Cla Au cô Trong Lam, Bàu Joq 'Nàng, wa Xèm Can Rìh. Tàng ùh canòm ca Au, ùh i ca mangai leq jah trùh ti Baq. ⁷ Tàng pì khoi loq ca Au, pì hadai khoi loq ca Baq. Pàng cô ta èh, pì loq ca Haq wa khoi hnoq Haq.”

⁸ Philip doi ca Haq: “Waiq Chuaq, xìn patô nhèn jah hnoq Baq, aih khoi tòm tau.”

⁹ Chuaq Jêxu doi ca haq: “Philip, Au khoi òi ta pì dùnh 'màng cô, mahaq ìh 'nhòq loq ca Au 'mòh? Mangai leq khoi hnoq Au, khoi hnoq Baq. 'Màng aih gleq ìh ma doi: Xìn patô ca nhèn Baq? ¹⁰ Ìh ùh lùì Au òi enh dalam ca Baq, Baq òi enh dalam ca Au 'mòh? Bàu Au ma anoi hnài pì, ùh xài au capoch ðeh, mahaq cla Baq òi enh dalam ca Au, Haq broq ðeh bìac Haq. ¹¹ Jò leq Au doi, Au òi enh dalam ca Baq, Baq òi enh dalam ca Au, pì phai lùì bàu Au. Tàng ùh, èh pì ngan bìac Au broq ðòiq pì lùì. ¹² Joq 'nàng, Au doi ca pì, mangai ma leq lùì Au, haq jah broq bìac Au ma broq; haq hadai jah broq bìac yi càn yi hnao ca aih hòm, ma jah 'màng aih Au hlài ti Baq. ¹³ Pì canòm hiniq Au ma waiq xìn bìac cleq, Au am ca pì, waq ca Baq jah 'ngah 'ngai òi ti Con. ¹⁴ Pì canòm hiniq Au, ùh kè bòch cleq, Au broq am ca pì.

¹⁵ “Tàng pì loq waq ca Au, èh pì wèq bàu thê da Au. ¹⁶ 'Màng cô Au jah bòch Baq, Haq jah am mòiq Yiang Jùp ðò ma 'noiq. Haq òi ta pì hloi hloi, ¹⁷ Haq Yiang Hadròih Bàu Joq 'Nàng ma mangai crõng taneh ùh jah ðìh yõc Haq taiq ùh hnoq Haq wa ji ùh loq ca Haq, mahaq pì loq ca Haq, ma jah 'màng aih Haq 'nang òi ta pì. Haq jah òi enh dalam ca pì. ¹⁸ Au ùh caðac pì broq mangai lac. Au jah hlài trùh ta pì. ¹⁹ Ùh dùnh ðàng leq hòm, mangai crõng taneh ùh jah hnoq Au hòm. Mahaq pì jah hnoq Au, ma jah 'màng aih Au rìh, pì hadai jah rìh. ²⁰ Trom hì aih pì jah loq, Au òi enh dalam ca Baq Au, pì òi enh dalam ca Au, Au òi enh

dalam ca pì. ²¹ Mangai leq i bàu thê Au wa wèq bàu thê aih, aih mangai loq waq ca Au, èh Baq Au loq waq hlài. Au hadai loq waq ca haq wa mahno dađeh ca haq.”

²² Juda mahaq ùh xài Ich-ca-ri-ôt, bòch Haq: “Chuaq ôi! 'Màng leq ìh jah mahno dađeh ca nhèn, mahaq ùh mahno ca mangai crõng taneh?”

²³ Chuaq Jêxu padreo hlài bàu doi: “Tàng i mangai loq waq ca Au, haq jah iu wèq bàu Au. Baq Au jah loq waq ca haq wa Ma jah trùh òi ti mangai aih. ²⁴ Mangai ma leq ùh loq waq ca Au, ùh iu wèq bàu Au. Bàu cô pì ma tàng ùh xài bàu Au, mahaq loh enh Baq, Haq ma thê Au trùh ta cô.

²⁵ “Au khoi anoi ca pì biác cô jò Au òi ta pì. ²⁶ Mahaq jò Yiang Júp Đò trùh, Haq Yiang Hadròih ma Baq canòm ca hiniq Au thê trùh, Haq jah hnài pì rìm trong điq đõng. Haq jah bahmàng pì rìm nà Au ma khoi doi ca pì. ²⁷ Au òiđiq hlài ca pì can catèm. Can catèm Au ma am ca pì, ùh xài 'màng ca crõng taneh ma am. Apaқ manhài ta manoh wa apaқ yùq crè.

²⁸ “Pì khoi tàng Au doi ca pì: ‘Au padon loh lam, khoi èh, Au jah tawìh hlài ta pì.’ Tàng pì loq waq ca Au, pì jah bùi lem, ma jah 'màng aih Au hlài ta Baq, Haq càn yi hnao ca Au. ²⁹ Jò cô, Au doi ca pì adroi, waq ca jò leq biác cô loh èh, pì jah lùì Au. ³⁰ Pàng cô ta èh, Au ùh capoch tùang ca pì bác hòm, ma jah 'màng aih kiác Satan, haq ma wèq crõng taneh cô jah trùh. Haq ùh i ca cwìang cleq enh 'nhèq ca Au. ³¹ Mahaq, waq ca mangai crõng taneh cô jah loq, Au loq waq ca Baq, Au broq tiaq rìm biác Baq Au ma thê.

“Yòng beq, bèn loh khoi enh nòi cô.”

15

Xèm Long Nho wa Hamenh Haq

¹ “Cla Au long nho joq 'nàng wa Baq Au, Haq pìt long nho. ² I hamenh òi ti Au ma ùh i ca plì, Haq coh cađac.

Tàng hamenh i plì, Haq cat palaoq hamenh leq ma loh plì, waq ca plì yi bàc tam hòm. ³ Pì khoi jah hliang hreo nhò bàu ma Au khoi anoi hnài pì. ⁴ Pì phai òi enh dalam ca Au tìah ca Au òi enh dalam ca pì. Tàng hamenh leq ùh top tiaq long nho, èh cla haq ùh jah loh plì. Tàng pì ùh òi enh dalam ca Au, èh hadai ùh jah loh plì.

⁵ “Au long nho, pì hamenh òi ti long cô. Mangai leq rìh òi enh dalam ca Au, Au òi enh dalam ca haq, èh haq jah loh plì bàc, ma jah 'màng aih enh gùng ca Au, pì ùh broq cleq ma jah. ⁶ Tàng mangai ma leq ùh òi hloi enh dalam ca Au, èh phai hwenh loh enh gùng, tìah ca hamenh nho talah ca xèm nho, èh haq croh. Wì tagop hlài hwenh đac ta ùnh, èh haq cheo. ⁷ 'Màng aih, tàng pì òi hloi enh dalam ca Au wa bàu Au òi hloi ta manoh pì, pì waiq xìn bìac cleq pì ma enh, èh jah am ca pì bìac aih. ⁸ Bìac ma broq ca Baq Au jah padèch, aih pì loh bàc plì. 'Màng aih jah loq, pì mangai hõc tiaq da Au.

⁹ “Au khoi loq waq ca pì 'màng ca Baq khoi loq waq ca Au. Phai wèq dàđeh òi hloi ti can loq waq Au. ¹⁰ Tàng pì wèq tiaq bàu thê Au, pì jah òi hloi ti can loq waq da Au, 'màng ca Au khoi wèq tiaq bàu thê Baq Au, wa Au òi hloi ti can loq waq Haq. ¹¹ Au khoi doi ca pì bìac cô, waq ca can lem bùi Au jah òi ta manoh pì, òiđiq can lem bùi pì jah tôm gêh.

Ranenh Loq Waq

¹² “Cô bàu thê Au ma hnài: Pì loq waq ca dabau, 'màng ca Au khoi loq waq ca pì. ¹³ Ùh i can loq waq leq yi càn hòm, aih can loq waq dèh ca bua ma cađac dèh can rìh. ¹⁴ Pì bua Au tàng pì hloi hloi broq bìac Au ma thê broq. ¹⁵ Au ùh creo ca pì hapõng hòm, ma jah 'màng aih hapõng ùh 'nì dèh ca craq haq broq cleq. Mahaq Au creo ca pì bua Au, taiq Au khoi hnài am ca pì rìm bìac ma Au khoi tàng

Baq Au doi ca Au. ¹⁶ Ûh xài pì khoi ràih Au, mahaq cla Au khoi ràih pì thê pì lam broq biac loh plì bàc, waq ca plì aih jah òi hloi hloi. 'Màng aih, ùh kè pì bòch Baq cleq canòm hiniq Au, Haq jah am ca pì. ¹⁷ Cô ranenh Au thê: Pì phai loq waq ca dabau.

¹⁸ “Tàng mangai crõng taneh git ca pì, èh pì loq, wì khoi git ca Au adroi ca wì git ca pì. ¹⁹ Tàng pì broq tiaq mangai crõng taneh, èh crõng taneh jah loq waq ca pì. Mahaq taiq pì ùh broq tiaq mangai crõng taneh, wa Au khoi ràih pì loh enh con mangai crõng taneh, ma jah mangai crõng taneh git ca pì. ²⁰ Phai hmàng hlài bàu Au ma khoi doi ca pì: ‘Ùh i ca hapõng leq càn yi hnao ca craq Haq.’[☆] Tàng wì khoi ti rùp Au, wì hadai ti rùp pì. Tàng wì khoi iu wèq bàu Au hnài, wì jah iu wèq bàu pì hadai. ²¹ Mahaq wì jah broq ca pì biac xa cô taiq hiniq Au, wa hadai taiq wì ùh loq ca Haq ma thê Au trùh ta cô. ²² Tàng Au ùh trùh doi ca wì, èh wì ùh i ca tôiq lôl cleq, mahaq manàiq cô wì pi jah pa'nen òòiq cadoc dèh tôiq cla. ²³ Mangai ma leq git ca Au, hadai git ca Baq Au. ²⁴ Tàng Au ùh broq òi ta wì biac 'nhòq lah i cabô nui broq, èh wì haq ùh i ca tôiq cleq. Mahaq manàiq cô wì khoi hnoq ro, mahaq wì xôq git ca Au wa Baq Au. ²⁵ Mahaq wì broq òiq ca biac cô òòiq broq xit bàu ma khoi achih ta Ranenh: ‘Wì git ca Au ùh i ca nen.’[☆]

²⁶ “Mahaq jò Yiang Jùp Đò khoi trùh, Yiang ma Au thê trùh enh Baq, Haq Yiang Bàu Joq 'Nàng trùh enh Baq, cla Haq aih jah anoi hlài biac Au, ²⁷ wa cla pì hadai jah anoi hlài biac Au taiq pì khoi òi ti Au enh jò baxèm.”

16

Bìac Yiang Hadròih Broq

☆ 15:20 15:20 Jon 13:16. ☆ 15:25 15:25 BCP 35:19; 69:4.

¹ “Au khoi doi ca pì òiq ca bìac cô òòiq pì ùh hìaq catòih cro. ² Wì jah nnan 'noh ðac pì loh enh gùng ca hnem tagop; jêh caðac pì, mahaq wì xoh ðaðeh patìh bìac Boc Plình. ³ Wì broq 'màng aih, taiq wì ùh loq ca Baq wa ùh loq ca Au. ⁴ Mahaq Au khoi doi ca pì bìac cô òòiq trùh jò aih, pì jah hmàng hlài Au khoi doi ca pì bìac aih. Baxèm Au ùh doi ca pì bìac cô taiq Au òi òi ta pì. ⁵ Mahaq manàiq cô Au padon hlài ta Haq ma khoi thê Au trùh ta cô. Òi ta pì, ùh i ca cabô bòch Au: ‘Thài lam ta leq?’ ⁶ Mahaq taiq Au khoi doi ca pì bìac cô, ta manoh pì bình halùih bìac mango. ⁷ Mahaq Au doi ca pì bìac joq 'nàng, Au loh lam, aih i òòiq ca pì, ma jah 'màng aih, tàng Au ùh lam khoi ca pì, Yiang Júp ðò ùh jah trùh ta pì. Mahaq tàng Au lam, Au jah thê Haq trùh ta pì. ⁸ Jò Haq trùh, Haq jah broq ca wì mangai crõng taneh canao loq ðeh ca tòi q lòi 'màng leq, loq ca bìac ta-atoq 'màng leq, wa loq ca bìac hadrah 'màng leq; ⁹ broq con mangai canao loq ðeh ca tòi q lòi taiq wì ùh lùì Au; ¹⁰ loq ca bìac ta-atoq, taiq Au padon hlài ti Baq Au, pì ùh jah hnoq Au hòm; ¹¹ bìac hadrah tòi q, taiq Boc Plình khoi hadrah baxa haq ma wèq crõng taneh cô, aih can kiac Satan.

¹² “Òi i bàc bìac Au enh hatùang ca pì, mahaq manàiq cô pì 'nhòq i padren tàu nhàn yõc. ¹³ Mahaq jò Yiang Hadròih, aih Bàu Joq 'Nàng trùh ta pì, Haq jah mahno ca pì loq tòm gêh bàu joq 'nàng. Ma jah 'màng aih Haq anoi ùh tiaq ðeh manoh, mahaq Haq capoch bàu Haq tàng, èh anoi hlài ca pì bìac jah loh atìq cô èh. ¹⁴ Haq jah padèch ha'nhèq Au, ma jah 'màng aih Haq nhàn bìac enh Au, anoi hlài ca pì. ¹⁵ ðìq bìac Baq khoi i, aih bìac Au. Ma jah Au doi ca pì, Yiang Hadròih, Haq jah yõc bìac enh Au wa anoi hlài ca pì.

Jò Mango wa Jò Bùì

¹⁶ “Ōi toq 'biaq hòm, pì ùh jah hnoq Au, mahaq gòm toq 'biaq hòm, pì jah hnoq Au.”

¹⁷ 'Màng aih, i wì òi ta mangai hóc tiaq Haq bòch dabau: “Haq capoch bàu cleq jò Haq doi: Toq 'biaq jò, pì ùh jah hnoq Au. Gòm toq 'biaq jò hòm, pì jah hnoq Au; wa bàu: Au hlài dèh ta Baq. Aih 'màng leq?” ¹⁸ 'Màng aih, mangai hóc tiaq òi bòch dabau: “Haq doi: Gòm toq 'biaq jò, aih 'màng leq? Bèn ùh 'nì tàng Haq anoi bìac cleq.”

¹⁹ Chuaq Jêxu khoi loq manoh wì enh bòch Haq. Haq doi ca wì: “Pì khoi bòch dabau: Bàu ma Au doi ca pì: Toq 'biaq jò, pì ùh jah hnoq Au; gòm toq 'biaq jò hòm, pì jah hnoq Au; bàu aih doi cleq, joq ùh? ²⁰ Joq 'nàng, Au doi ca pì: Pì jah hmoi, crò ta-oih, mahaq mangai crống tanèh jah lem bùi. Pì jah mango, mahaq mango da pì jah wìh wìa lem bùi. ²¹ Jò gu cadri padon xa-ông, haq jìq xa, mahaq jò haq khoi jah xa-ông con, haq ùh hmàng biac jìq xa hòm, taiq haq bùi lem khoi xa-ông con loh ta crống tanèh. ²² 'Màng cô, pì hadai loq mango manàiq cô, mahaq Au jah hnoq pì mòiq yàng hòm. Jò aih pì jah bùi lem. ùh i ca mangai leq jah bahnhung đac bìac bùi lem da pì. ²³ Hì aih pì ùh òi bòch Au bìac cleq hòm. Joq 'nàng, Au doi ca pì: Bìac cleq pì ma canòm ca hiniq Au waiq xìn Baq, Haq am ca pì. ²⁴ Trùh manàiq cô, pì ùh lah canòm hiniq Au bòch bìac cleq. Manàiq cô bòch beq, pì jah nhàn yóc waq ca bìac can bùi lem da pì jah gêh tôm.

²⁵ “Au khoi capoch bàu aliah doi ca pì bìac cô. Manàiq ten trùh jò Au ùh capoch bàu aliah hòm, mahaq Au jah anoi hlài ro bìac Baq am ca pì. ²⁶ Hì aih pì jah canòm hiniq Au, waiq khàn. Au ùh doi: Au ep bòch Baq thai ca pì, ²⁷ taiq Baq loq waq ca pì taiq pì khoi loq waq ca Au wa pì khoi lùì Au khoi loh enh Boc Pình. ²⁸ Au khoi loh enh Baq trùh ta crống tanèh. Manàiq Au cadac crống tanèh hlài ti Baq.”

²⁹ Wì mangai hõc tiaq Haq doi: “Manàiq cô ìh khoi capoch ro rang, ùh capoch bàu aliah hòm. ³⁰ Manàiq cô nhèn loq, Thài loq điq đõng rìm hiniq. Ùh nhet ca i mangai leq bõch ìh hòm, taiq nen aih nhèn lùì ìh joq 'nàng loh enh Boc Plình.”

³¹ Chuaq Jêxu doi: “Manàiq cô pì lùì ùh? ³² Ten trùh jò, joq 'nàng khoi trùh, pì cadàu tac mac mòiq ngai mòiq trong. Pì đòiq Au òi ðeh mòiq Ngai, mahaq Au ùh òi mòiq Ngai taiq i Baq òi ti Au.

³³ “Au khoi doi ca pì biac cô waq ca pì jah òi catèm ti Au. Òi crõng taneh pì ep chiùq biac nan xa, mahaq pì phai cajap manoh, ma jah 'màng aih Au khoi 'blêq ca crõng taneh.”

17

Bàu Waiq Khàn da Chuaq Jêxu

¹ Jò Chuaq Jêxu hêq ca doi bàu aih, Haq ngoi ngan ta plình waiq khàn:

“Baq ôi, khoi trùh jò xìn ìh broq ca Con jah 'ngah 'ngai waq ca Con hadai broq ca Baq jah 'ngah 'ngai.

² “ 'Màng ca ìh khoi am ca Con cwìang itai enh 'nhèq ca mangai điq đõng, Con am ca wì can rìh hloi hloi, aih mangai Baq ma khoi jao am ca Con. ³ Can rìh hloi hloi, aih canao loq ca Baq, Boc Plình joq 'nàng, wa Chuaq Jêxu Crich ma ìh khoi thê trùh. ⁴ Au khoi broq 'ngah 'ngai hiniq ìh òi crõng taneh. Au khoi broq điq biac ma ìh khoi jao ca Au broq. ⁵ Manàiq cô, xìn Baq broq Au jah 'ngah 'ngai lem lình enh ngìa ca Baq, aih 'ngah 'ngai lem lình ma Au i pajùm ca ìh adroi ca jò broq plình crõng taneh.

⁶ “Au khoi pa'noh hiniq ìh am ca wì ìh ma khoi am ca Au enh crõng taneh. Wì haq mangai da ìh, èh ìh khoi

am wì ca Au. Wì khoi iu wèq bàu ìh. ⁷ Manàiq cô wì loq rìm bìac ma ìh khoi am ca Au, òiq òng trùh enh ìh. ⁸ Ma jah 'màng aih bàu ma ìh khoi doi ca Au, Au doi ca wì. Wì iu bàu cô wa wì loq Au trùh enh ìh, wa lùì ìh khoi thê Au trùh ta cô. ⁹ Au waiq khàn am ca wì. Au ùh waiq khàn am ca mangai cởng taneh, mahaq waiq khàn am ca wì ma ìh khoi am ca Au, ma jah 'màng aih wì mangai da ìh. ¹⁰ Rìm bìac Au ma i, aih bìac da Baq, wa òiq òng bìac cleq da Baq, hadai aih da Au. Au jah 'ngah 'ngai lem linh nhò wì haq. ¹¹ Manàiq Au ùh òi ta cởng taneh hòm, mahaq wì haq xôq òi ta cởng taneh. Au hlài ta ìh. Waiq Baq Hadròih, xìn wèq ban wì òi ta hiniq ìh, hiniq ma ìh khoi am ca Au, waq ca wì broq mòiq manoh 'màng ca Ba xôq mòiq manoh. ¹² Jò Au òi ta wì, Au khoi wèq ban wì ma ìh khoi am ca Au òi ta hiniq ìh. Au khoi wèq ban wì haq òòiq ùh hnhung mòiq ngai, enh gùng ca mangai ma jah creo con da bìac raliang cađac, tiaq bàu ma khoi achìh ta Sech Hadròih jah xit.

¹³ “Manàiq cô Au hlài ta ìh. Jò Au òi ta cởng taneh, Au doi òiq ca bìac cô waq ca can bùì lem da Au jah ùc bình ta manoh wì. ¹⁴ Au khoi doi ca wì bàu ìh. Cởng taneh khoi git ca wì taiq wì ùh broq mangai cởng taneh tìah ca Con hadai ùh broq Mangai da cởng taneh. ¹⁵ Au ùh waiq xìn Baq yốc 'noh wì khoi enh cởng taneh, mahaq xìn ìh wèq ban wì khoi ca can kiac dù. ¹⁶ Wì haq ùh broq mòiq manoh ca mangai cởng taneh, 'màng ca Au ùh broq mòiq manoh ca mangai cởng taneh. ¹⁷ Xìn ìh yốc bàu joq 'nàng broq wì wìa mangai hadròih. Bàu ìh aih bàu joq 'nàng. ¹⁸ ìh khoi thê Au trùh cởng taneh 'màng leq, Au hadai thê wì lam ta cởng taneh. ¹⁹ Taiq wì ma Au broq hadròih dađeh, waq ca wì hadai jah wìa hadròih nhò bàu joq 'nàng.

²⁰ “Au ùh xài toq waiq khàn am ca wì, mahaq Au waiq khàn am diq dõng mangai ma lùì Au nhò bàu anoi hnài wì haq. ²¹ Waq ca wì diq dõng broq mòiq, 'màng ca Baq òi enh dalam ca Au, Au òi enh dalam ca Baq. 'Màng aih wì hadai broq mòiq òi ta Ba waq ca crõng taneh jah lùì ìh khai thê Au trùh ta cô. ²² 'Màng ca Au khai am ca wì haq 'ngah 'ngai lem linh ìh ma khai am ca Au, waq ca wì jah broq mòiq, hadai broq mòiq tìah ca Ba. ²³ Au òi enh dalam ca wì haq, wa ìh òi enh dalam ca Au, waq ca wì jah broq mòiq diq ca manoh. 'Màng aih mangai crõng taneh jah loq ìh khai thê Au trùh, wa loq ìh loq waq ca wì 'màng ca ìh loq waq ca Au.

²⁴ “Ôi Baq! Wì mangai ma ìh khai am ca Au, Au enh waq wì òi ti Au. Au òi ti leq, wì hadai òi ti aih, waq ca wì hnoq 'ngah 'ngai lem linh da Au ìh ma khai am ca Au, ma jah 'màng aih ìh khai loq waq ca Con adroi ca jò broq loh crõng taneh.

²⁵ “Ôi Baq ta-atoq, 'nhac ca wì crõng taneh ùh loq ca ìh, mahaq Au loq ca ìh, wa 'bài mangai cô loq cla ìh ma thê Au trùh ta cô. ²⁶ Au khai patô am ca wì loq hiniq ìh, wa Au òi patô am ca wì loq hiniq ìh tam hòm, waq ca can loq waq ma ìh am ca Au, jah òi ta manoh wì, wa Au hadai òi enh dalam ca wì haq.”

18

Wì Rùp Chuaq Jêxu ta Wùan Ghêt-sê-ma-nê

(Mat 26:47-56; Mõc 14:43-50; Luc 22:47-53)

¹ Chuaq Jêxu waiq khàn khai gêh, Haq loh enh gùng pajùm dèh ca wì mangai hõc tiaq, lam cwa diac con Kitrôn. I wùan òi ti aih. Haq mùt ta wùan pajùm dèh ca mangai hõc tiaq.

² Juda, mangai ma blòq Chuaq Jêxu, loq ca wùan cô, ma jah 'màng aih Chuaq Jêxu wa mangai hóc tiaq Haq khoi lam ti aih bàc yàng. ³ Juda 'ràng jèn 'bài linh wa mangai rap ma wì pajàu càn wa mangai Pha-ri-si thê lam tiaq haq, mùt ta wùan. Wì haq wê hadrêu wa ranac tajêh.

⁴ Chuaq Jêxu loq điq đống ca biac ma padon trùh ca Haq. Haq loh đìh wì, bòch: “Pì chaq bô?”

⁵ Wì tèo Haq: “Chaq Chuaq Jêxu, Mangai Na-xa-ret.”

Chuaq Jêxu doi: “Cô, Au cô.” Juda mangai ma blòq Chuaq Jêxu, yòng pajùm ca wì.

⁶ Jò Chuaq Jêxu doi: “Cô Au”, wì talùi ratàc cloh ta taneh.

⁷ Khoi èh, Chuaq Jêxu bòch wì mòiq yàng hòm. “Pì chaq cabô?”

Wì doi: “Chuaq Jêxu Mangai Na-xa-ret.”

⁸ Chuaq Jêxu padreo hlài bàu: “Au khoi doi ca pì: Cô Au. Mahaq tàng pì joq 'nàng chaq rùp Au, pì phai ca'naih 'bài mangai cô lam.” ⁹ Biac cô loh xit troi bàu Chuaq Jêxu khoi doi iq: “Ta 'bài wì ma ìh khoi am ca Au, Au ùh hnhung mòiq ngai leq.”[☆]

¹⁰ Simôn Pêtrô i chang. Haq đõih chang jêh hapõng da pajàu ha'nhèq, pốt don haq pah 'ma. Hiniq hapõng aih Manchu.

¹¹ 'Màng cô, Chuaq Jêxu doi ca Pêtrô: “Đòiq hlài chang mùt ta hnup beq! Doi chrõng ma Baq Au khoi am Au ôq, gleq ma jah Au ùh ôq?”

Chuaq Jêxu Enh Ngìa ca Anne wa Caiphe

¹² Atìq ca aih, đòiq linh wa wì mangai rap enh wì mangai Yothaiq ma broq gàu, rùp Chuaq Jêxu hi cật Haq. ¹³ Wì 'ràng Haq trùh ti Anne adroi, ma jah 'màng aih Anne, baq mai Caiphe ma broq pajàu ha'nhèq hanam cô. ¹⁴ Caiphe cô

[☆] 18:9 18:9 Jon 6:39.

raq haq mangai ma khoi doi ca mangai Yothaiq ma broq gàu: “Tàng mòiq ngai cachit thai ca wì diq dõng, cô lem.”

Pêtrô Hangah Chuaq

(Mat 26:69-70; Mõc 14:66-68; Luc 22:55-57)

¹⁵ Simôn Pêtrô pajùm ca mòiq ngai mangai hõc tiaq ma 'noi q lam tiaq Chuaq Jêxu. Pajàu ha'nhèq canao mangai hõc tiaq ma 'noi q aih, 'màng cô haq jah mùt ta xàn hnem pajàu ha'nhèq pajùm ca Chuaq Jêxu. ¹⁶ Mahaq Pêtrô yòng enh gùng ca 'mang ngo. Mangai hõc tiaq ma canao loq ca pajàu ha'nhèq tau, haq loh enh gùng, doi ca gu cadrì ma gòm 'mang ngo, hi khoi 'ràng Pêtrô mùt.

¹⁷ Khoi èh, gu cadrì ma gòm wèq 'mang doi ca Pêtrô: “Ìh hadai mangai hõc tiaq Mangai meh, joq ùh?”

Pêtrô doi: “Ừh, au ùh xài.”

¹⁸ Manàiq cô wì mangai hapõng wa 'bài mangai rap, khoi hlôi ùnh wa wì yòng 'nhìa ùnh taiq tanget. Pêtrô õi ti wì xôq yòng 'nhìa ùnh.

¹⁹ Pajàu ha'nhèq bòch Chuaq Jêxu biac mangai hõc tiaq Haq 'màng leq, wa biac Haq ma hnài 'màng leq.

²⁰ Chuaq Jêxu padreo hlài bàu doi: “Au khoi doi ro ca wì õi ta crõng taneh. Au khoi hnài yõt wì õi ta hnem tagop, loq õi ta Hnem Cùh Waiq, aih nòi mangai Yothaiq tagop diq dõng. Au ùh lah cadoc biac cleq. ²¹ Gleq ma bòch Au? Bòch wì ma khoi tàng biac Au khoi doi ca wì beq. Wì loq ca biac ma Au khoi hnài.”

²² Jò Haq doi 'màng cô, i mòiq ngai rap ma yòng ti aih, tep Chuaq Jêxu, haq doi: “Ìh hùa tèo hlài ca pajàu ha'nhèq 'màng aih 'mòh?”

²³ Chuaq Jêxu doi: “Tàng Au capoch ùh troq, ìh phai anoi hlài bàu ma leq ma ùh troq. Mahaq tàng Au capoch troq, gleq ìh ma tep Au?” ²⁴ Khoi èh Anne thê wì 'ràng Haq, xôq õi cật, trùh ta hnem pajàu ha'nhèq Caiphe.

²⁵ Jò aih Simôn Pêtrô xôq òi yòng 'nhìa ùnh. Wì bòch haq: “Ìh hadai broq mangai hõc tiaq Haq ajoq?”

Mahaq Pêtrô hangah doi: “Ùh, au ùh xài.”

²⁶ Mòiḡ ngai hapõng pajàu ha'nhèq, oh daq ca mangai ma Pêtrô khoi põt don haq, doi: “Au khoi hnoq ìh òi pajùm ca Haq òi ta wùan, joq ùh?” ²⁷ Mòiḡ yàng hòm, Pêtrô hangah doi: “Ùh!” Tajòi 'mòi ia rõng.

Chuaq Jêxu Enh Ngìa ca Philat

(Mat 27:1-2,11-31; Mõc 15:1-20; Luc 23:1-5,13-25)

²⁸ Khoi èh wì 'ràng Chuaq Jêxu loh enh hnem Caiphe mùt Adùq Hadrah Rôma ta hnem tình truang. Manàiq òi raq xrõih xroq. Wì ùh hùa mùt ta hnem yùq broq ùh hadròih ca dađeh, èh ùh jah caq Lè Lam Cwa. ²⁹ 'Màng aih, Philat loh ãnh wì enh gùng. Haq bòch: “Pì kìa Mangai cô biac cleq?”

³⁰ Wì tèo: “Tàng Haq ùh broq dù, nhèn ùh 'ràng Haq am ca ìh.”

³¹ Philat doi ca wì: “Pì 'ràng Haq hlài. Pì hadrah haq tiaq ranenh pì beq!”

Wì mangai Yothaiq tèo haq, doi: “Nhèn ùh i cwiang hadrah ãnh jêh đac mangai.”

³² Biac cô khoi trùh ãnh broq xit troi bàu Chuaq Jêxu khoi doi adroi, Haq phai cachit 'màng leq.

³³ Philat mùt hlài ta Adùq Hadrah, bòch Chuaq Jêxu: “Ìh Bùa mangai Yothaiq ajoq?”

³⁴ Chuaq Jêxu tèo haq: “Ìh capoch tiaq dèh manoh, loq khoi i mangai leq anoi biac Au ca ìh?”

³⁵ Philat doi: “Au mangai Yothaiq 'mòh? Con jàn ìh wa pajàu cần khoi 'ràng ìh trùh jao ti au. ìh khoi broq cleq?”

³⁶ Chuaq Jêxu tèo: “Diac Au Broq bùa ùh xài loh enh con mangai òi ta Diac crõng taneh cô. Tàng Diac Au Broq bùa loh enh con mangai crõng taneh, 'màng cô hapõng Au

jah tabroq tajêh wèq Au, ùh am Au ca wì mangai Yothaiq. Mahaq Diac Au Broq bùa ùh xài loh enh con mangai crõng taneh cô.”

³⁷ Philat doi ca haq: “ 'Màng aih ìh broq Bùa 'mòh?”

Chuaq Jêxu tèo: “Joj 'nàng Au broq Bùa, 'màng ca ìh khoi doi. Au khoi xa-ông wa khoi trùh ta crõng taneh waq ca Au jah anoi hlài bàu joq 'nàng. Mangai ma leq tiaq bàu joq 'nàng haq loq tàng bàu Au.”

³⁸ Philat bòch Haq: “Bàu joq 'nàng, aih cacleq?” Khoi ca doi bàu cô, Philat loh enh gùng, doi ca wì mangai Yothaiq: “Au chaq ùh hnoq tôiq lôl cleq òi ta Haq. ³⁹ Mahaq tiaq troi ranenh pì ma khoi canao broq dèh enh adroi, ta'nàih ca hì caq Lè Lam Cwa èh, au ca'nàih mòiq ngai, mangai tù. Pì enh au ca'nàih Bùa Mangai Yothaiq am ca pì ùh?”

⁴⁰ Wì dìq dõng creò bàu dèh: “Ùh, apaq ca'nàih Haq, mahaq ca'nàih 'Ba-ra-ba!” 'Ba-ra-ba cô, haq mangai atùng.

19

Wì Mangai Lình Lê Baxa Chuaq Jêxu

¹ Hi khoi, Philat thê wì 'nong Chuaq Jêxu lam wa blai Haq. ² Wì mangai lình broq cadoh xam hila pacôl ca Haq ti gàu, am ca Haq caxùnh eo ma gòh drinh. ³ Wì trùh ti Haq capoch lê, doi: “Waiq Bùa mangai Yothaiq.” Khoi ca aih wì tep hadrò Haq.

⁴ Khoi èh, Philat loh enh gùng mòiq yàng hòh, doi ca wì: “Ngan cô, au 'ràng Haq loh enh ngìa ca pì, waq ca pì loq au chaq ùh hnoq tôiq lôl cleq òi ti Haq.” ⁵ Chuaq Jêxu cadiang loh; gàu côl cadoh broq xam hila; chac Haq caxùnh eo ma gòh drinh. Philat doi ca wì: “Ngan Mangai cô!”

⁶ Jò wì pajàu càn wa 'bài mangai rap hnoq Haq, wì creo bàu dêh: “Tiang đình Haq ta long pagat beq! Tiang đình Haq ta long pagat beq!”

Philat doi: “Pì tiang đình Haq beq! Au chaq ùh i tôiq lôi cleq ối ti Haq.”

⁷ Mangai Yothaiq tèo: “Nhèn i ranenh, tiaq ranenh cô Haq phai cachit taiq Haq doi, Haq Con Calô Boc Plinh.”

⁸ Jò Philat tàng bàu cô, haq yi yùq crè tam hòm. ⁹ Haq mùt hlài ta Adùq Hadrah, bòch Chuaq Jêxu: “Ìh trùh enh leq?” Mahaq Chuaq Jêxu ùh tèo haq. ¹⁰ Philat bòch hòm: “Gleq Ìh ùh doi ca au bàu cleq? Ìh ùh 'nì au i cwìang ca'naih Ìh wa i cwìang tiang đình Ìh 'mòh?”

¹¹ Chuaq Jêxu padreo hlài bàu: “Ìh toq i cwìang enh 'nhèq ca Au tàng Boc Plinh am ca ìh cwìang aih. 'Màng aih, mangai ma khoi 'ràng Au am ca ìh, haq aih i tôiq yi càn.”

¹² Enh jò aih, Philat chaq trong òoq ca'naih Haq, mahaq wì mangai Yothaiq creo bàu dêh doi: “Tàng ìh ca'naih Mangai cô, ìh ùh xài bua da Sêsa. Mangai leq ma doi dađeh broq bùa, èh mangai aih enh ta'blêq ca Sêsa.”

¹³ Jò Philat tàng bàu cô, haq 'ràng Chuaq Jêxu loh enh gùng. Haq ha'ngui ta gèq hadrah wì creo, Nòi Xap Hmu, bàu Yothaiq doi, Ga-ba-tha. ¹⁴ Manàiq Hì Padon Caq Lè Lam Cwa trùh ten 12 jò.

Philat doi ca wì mangai Yothaiq: “Cô Bùa pì.”

¹⁵ Mahaq wì creo bàu dêh doi: “Jêh cađac Haq! Jêh cađac Haq! Tiang đình Haq ta long pagat.”

Philat doi ca wì: “Au tiang đình Bùa pì ta long pagat 'mòh?”

Wì pajàu càn padreo hlài bàu: “Enh gùng ca Sêsa, nhèn ùh i ca bùa.”

¹⁶ Khoi èh, haq am ca wì Chuaq Jêxu waq ca wì tiang đình Haq.

*Chuaq Jêxu 'Bìq Wì Tiang Đình**(Mat 27:32-56; Mốc 15:21-41; Luc 23:26-49)*

Wì rùp Chuaq Jêxu hi 'nong Haq lam. ¹⁷ Haq xùì dèh long pagat trùh ta nòi Cadôh, bàu Yothaiq doi, Gô-gô-tha. ¹⁸ Wì tiang đình Haq ti aih. I baiq ngai ma 'noi q hòm hadai 'bìq tiang đình troi Haq, mòi q ngai mòi q apah, Chuaq Jêxu ôi ta 'ne.

¹⁹ Philat thê wì broq mòi q capiac long ban atua nòi long pagat Haq. Ta long ban aih, achìh 'màng cô: Chuaq Jêxu Mangai Na-xa-ret, Haq Bùa Mangai Yothaiq. ²⁰ I bàc Ngai Yothaiq jah đốc bàu cô, ma jah 'màng aih nòi ma wì tiang đình Chuaq Jêxu haten ca phôq. Khoi achìh chù cô xam bàu Yothaiq, bàu Rôma, bàu Hilap. ²¹ Wì pajàu càn Yothaiq doi ca Philat: “Apaq achìh: ‘Bùa Diac Yothaiq,’ mahaq phai achìh: Haq doi: Au broq Bùa jàn Yothaiq.”

²² Philat tèo: “Bìac ma au khoi achìh, òi q 'màng 'mat raq.”

²³ Jò wì mangai lình khoi tiang đình Chuaq Jêxu, wì yốc eo Haq, axong pôn phàn, mòi q ngai mòi q phàn, mahaq eo yôh ùh i ca trong jìp, khoi jah tenh enh 'nhèq trùh ta 'neq.

²⁴ 'Màng aih, wì doi: “Apaq hich eo cô. Bèn pàih panàih beq, loq jah cabô.”

Wì khoi broq bìac cô òi q xít ca Bàu Sech Hadròih khoi achìh:

“Wì axong eo Au,

wa pàih panàih waq ca loq eo yôh Au jah cabô.”[☆]

Wì mangai lình khoi broq troq bìac cô.

²⁵ Mahaq i miq Chuaq Jêxu wa daq miq, aih Mari mai Clôpa, wa Mari Ma-đò-len, wì yòng haten ca long pagat Chuaq Jêxu. ²⁶ Jò Chuaq Jêxu hnoq miq Haq wa mangai hóc tiaq cô ma Chuaq loq waq ca haq, Haq doi ca miq Haq: “Miq ôi, haq con ìh.” ²⁷ Hi khoi, Haq doi ca mangai hóc

[☆] 19:24 19:24 BCP 22:18.

tiaq aih: “Cô miq ìh.” Pàng aih, mangai hóc tiaq cô 'ràng miq Chuaq Jêxu ahlài dèh ta hnem wèq haq.

²⁸ Khoi èh, Chuaq Jêxu khoi loq rìm bìac òiq òngg khoi broq gêh òiq jah xit troi bàu ma khoi achìh ta Sech Hadròih, Haq doi: “Au croh ranǒng.” ²⁹ Jang aih i mòiq toq padrì ùc bình diac jòq. Wì yǒc mòiq cato yù dayan chùq ta diac jòq, cật ta hamenh long xôn, dèch ahacùng Haq. ³⁰ Jò Chuaq Jêxu khoi òq diac jòq cô, Haq doi: “Òiq ca hiniq khoi gêh!” Khoi ca aih, Haq cùp gàu, hi 'noh dèh mahua yang.

³¹ Hì aih Hì Padon Caq Lè Lam Cwa. Wì mangai ma wèq cwàng mangai Yothaiq, ùh enh òiq hanang òi ta long pagat ta hì Sabat taiq hì aih hì càn. 'Màng aih wì xìn Philat am ca wì tong tagoh caxènh tangon wì òiq 'noh hanang loh ha'neq. ³² Wì mangai lình trùh ti mangai baxèm, wì tong tagoh caxènh tangon haq, wa mangai 'noi hadai ma wì khoi tiang òngg adrinh ca Chuaq Jêxu. ³³ Mahaq jò wì trùh jang Chuaq Jêxu, wì hnoq Haq khoi cachit. Wì ùh broq tagoh caxènh tangon Haq. ³⁴ Mahaq i mòiq ngai lình yǒc jaoq bit caxènh himìa Haq. Tajòì 'mòi i mahem wa diac loh. ³⁵ Mangai ma hnoq bìac cô anoi hlài bàu cô. Bàu cô joq 'nàng, wa mangai aih loq ca dađeh capoch joq 'nàng waq ca pì hadai lùì. ³⁶ Bìac cô, aih broq xit troi bàu ma Sech Hadròih khoi achìh: “Ùh i mòiq toq caxènh leq da Haq jah tagoh.”[☆] ³⁷ I brong ma 'noi òi ta Sech Hadròih khoi achìh: “Wì jah ngan Mangai wì ma khoi bit.”[☆]

Bìac Catùh Chuaq Jêxu

(Mat 27:57-61; Mǒc 15:42-47; Luc 23:50-56)

³⁸ Khoi èh, i Jôsep mangai òi plài A-ri-ma-thê, aih mangai hóc tiaq Chuaq Jêxu, mahaq haq tiaq òngg hlèp taiq

[☆] 19:36 19:36 LEA 12:46; SJ 9:12; BCP 34:20. [☆] 19:37 19:37 Xach 12:10.

Haq yùq crè ca mangai Yothaiq. Haq bòch Philat xìn yǒc 'ràng hanang Chuaq Jêxu. Philat am. 'Màng cô haq lam yǒc hanang Chuaq Jêxu, ³⁹ wa i Ni-cô-đem, mangai jò aih nèh i trùh ta Chuaq Jêxu damang, hadai lam tiaq Jôsep. Haq 'ràng jah 34 kìq mùc jùac wa gahnàu. ⁴⁰ 'Màng cô wa 'noh hanang Chuaq Jêxu, wa yǒc bai habùac wa dahwèq xua thùm caxop hanang Haq tiaq ranenh catùh hanang mangai Yothaiq. ⁴¹ Nòi ma wì tiang đình Haq i wùan. Ta cô i còp hmu broq ralùng neo 'nhòq lah òđi q cabô. ⁴² 'Màng cô, tiaq ten trùh hì Lè Lam Cwa da mangai Yothaiq, wa ralùng còp hmu haten ti aih, wì 'mùt pròih hanang Chuaq Jêxu ta aih.

20

Chuaq Jêxu Rìh Hlài

(Mat 28:1-10,16-20; Mǒc 16:1-11,14-18; Luc 24:1-12,36-49)

¹ Hì gàu tùang, plình òi clam, Mari Ma-đò-len lam trùh ti còp hmu. Haq hnoq hmu ma broq 'mang khi cadro ta kenh. ² Haq cadàu lam trùh ti Simôn Pêtrô wa mangai hǒc tiaq ma 'noi q, aih mangai ma Chuaq Jêxu loq waq. Haq doi: “Wì khi 'nong hanang Chuaq loh khi enh còp hmu, ùh 'nì wì òđi q Haq ta leq.”

³ Khi ca tàng bàu cô, Pêtrô wa mangai hǒc tiaq ma 'noi q loh lam ti còp hmu. ⁴ Wa bai q ngai cadàu, mangai hǒc tiaq ma 'noi q cô cadàu yi renh trùh ta còp hmu adroi. ⁵ Haq cùp ngan hnoq toq bai habùac caxop ta nòi ma òđi q hanang Chuaq Jêxu, mahaq haq ùh mùt. ⁶ Khi èh, Simôn Pêtrô trùh atì q mùt ta còp hmu, hnoq bai habùac caxop ta nòi ma òđi q hanang Haq. ⁷ Mù côi gàu Haq, ùh òi ti bai habùac caxop hanang, mahaq khi canua òđi q ta nòi ma crài. ⁸ Khi èh mangai hǒc tiaq ma trùh ta còp hmu adroi ca haq hadai mùt, haq hnoq, haq lùì. ⁹ Ma jah 'màng aih wa 'nhòq loq tàng bàu Sech Hadròih khi achìh: Chuaq Jêxu

phai enh mangai cachit rih hlài. ¹⁰ Khoi èh, wa mangai hõc tiaq hlài dèh ta hnem.

¹¹ Mahaq Mari gòm enh gùng ca còp hmu, haq hmoi. Haq rai hmoi, rai cùp ngan trom còp hmu. ¹² Haq hnoq baiq 'bình plình caxùnh eo taboc đang ha'ngui jang nòi wì ma ðòiq hanang Chuaq Jêxu, mòi q ha'ngui pah gàu, mòi q ha'ngui pah jènh.

¹³ Wa 'bình plình bõch haq: “Ê daq cadrì, gleq ìh ma hmoi?”

Haq doi ca wa: “Wì khoi 'nong Chuaq au ta nòi 'noi q, ùh 'nì wì ðòiq Haq ta leq.” ¹⁴ Anoi bu khoi, haq wìh hlài hnoq Chuaq Jêxu yòng ti aih, mahaq haq ùh 'nì Haq aih Chuaq Jêxu.

¹⁵ Chuaq Jêxu doi ca haq: Õi daq cadrì: “Gleq ìh ma hmoi? ìh chaq bõ?”

Haq xoh dèh aih mangai broq wùan, haq doi: “Ôi daq, tàng ìh khoi 'nong Haq loh khoi nòi cô, xìn doi ca au ìh khoi ðòiq Haq òi ti leq, au jah 'ràng ahlài Haq.”

¹⁶ Chuaq Jêxu doi ca haq: “Mari!” Mari wìh hlài, haq doi dèh xam bàu Yothaiq: “Ra-bõ-ni!”, aih i hiniq Thài.

¹⁷ Chuaq Jêxu doi ca haq: “Apaq rùp pajràng Au, ma jah 'màng aih Au 'nhòq tõi ta Baq! Mahaq lam beq, doi ca oh daq Au: ‘Au padon tõi ta Baq Au, aih Baq pì; tõi ta Boc Plình Au, aih Boc Plình pì.’”

¹⁸ Mari Ma-ðò-len loh lam, anoi ca wì mangai hõc tiaq: “Au khoi hnoq Chuaq!” Haq ta'mon hlài ca wì biac Chuaq ma khoi doi ca haq.

Chuaq Mahno Dadeh ca Mangai Hõc Tiaq

¹⁹ Jò chiù, hì gàu tùang aih, 'bài mangai hõc tiaq 'nang tagop òi ta hnem. Wì clenh cajap ðõng ðìq 'mang taiq wì crè ca mangai Yothaiq. Chuaq Jêxu trùh ta wì, yòng ta'ne, doi: “Catèm am ca pì.” ²⁰ Khoi ca doi bàu cô, Haq am ca wì

hnoq tì Haq wa himìa Haq. Wì mangai hõc tiaq manè diq ca jaq taiq wì hnoq Chuaq.

²¹ Chuaq Jêxu doi ca wì mòiq yàng hòim: “Catèm am ca pì. 'Màng ca Baq khoi thê Au lam trùh, 'màng aih Au hadai thê pì lam.” ²² Rai doi bàu cô, Haq rai hlôi 'mùt hòì dèh ca 'bài mangai hõc tiaq, rai doi: “Pì phai yõc nhàn Yiang Hadròih beq! ²³ Mangai leq ma pì baxõng tôiq lòi am ca haq, tôiq lòi haq jah baxõng. Mangai leq pì ma ùh baxõng tôiq lòi da haq, tôiq lòi haq òi hlài.”

²⁴ Mahaq jò Chuaq Jêxu trùh, Thôma (hadai i hiniq Con Camia), hanoh mòiq ngai òi ta 12 ngai, mangai hõc tiaq, ùh i òi jang aih. ²⁵ Wì mangai hõc tiaq ma 'noi q doi ca haq: “Nhèn khoi hnoq Chuaq!”

Mahaq haq doi ca wì: “Tàng au ùh hnoq habau ðình ta tì Haq, ùh bèq nòi habau ðình aih ta capiang tì, wa ùh bèq nòi habau jang caxènh himìa Haq, au ùh lùì!”

²⁶ Khoi ca aih rahem hì, wì mangai hõc tiaq tagop ca dabau òi ta hnem, wa i Thôma òi ti wì. Diq ca 'mang khoi clenh ðõng diq, mahaq Chuaq Jêxu trùh yòng ta'ne ca mangai hõc tiaq, doi: “Catèm am ca pì!” ²⁷ Chuaq Jêxu doi ca Thôma 'màng cô: “Dèch tì ìh bèq jang cô, wa ngan capiang tì Au cô, khoi èh dèch capiang tì ìh bèq jang himìa Au beq. Apa q cadoq manoh mahaq phai lùì Au.”

²⁸ Thôma doi ca Haq: “Wai q Chuaq da au, wa Boc Plình da au.”

²⁹ Chuaq Jêxu doi ca Thôma: “I joq ìh lùì ma jah 'màng aih taiq ìh khoi hnoq Au ùh? Xõq ramõt am ca mangai 'nhòq i hnoq, mahaq khoi lùì Au.”

³⁰ 'Màng aih, Chuaq Jêxu broq bàc teo halac enh ngìa dèh ca 'bài mangai hõc tiaq, mahaq ùh i achìh ta sech cô. ³¹ Mahaq khoi achìh bìac cô waq ca pì lùì Chuaq Jêxu, Haq Chuaq Crich, Con da Boc Plình, wa nhò manoh lùì aih, oh ðaq jah rìh ta hiniq Haq.

21

Chuaq Jêxu ta Braih Diac Raxiq

¹ Atiq ca biac cô, Chuaq Jêxu loh mahno dadeh ca mangai hõc tiaq Haq õi ta 'bò diac raxiq Ti-bê-ri-at. Haq mahno 'màng cô: ² I Simôn Pêtrô, i Thôma, (hadai i hiniq: Con Camia), Nê-tha-nên õi ta plài Cana, gùng Ga-li-lê, baiq con calô Xê-bê-đê wa baiq mangai hõc tiaq ma 'noi q hòm. Wì haq 'nang õi ti dabau. ³ Simôn doi ca wì: “Au lam ranang ca.” Wì doi ca haq: “Nhèn hadai lam broq pajùm ca ìh.” Wì haq loh lam, tõi ta bong, mahaq dìq ca mang aih wì ùh jah cacleq.

⁴ Trùh xrõih xroq, Chuaq Jêxu yòng kenh 'bò diac raxiq, mahaq mangai hõc tiaq ùh canao aih Chuaq Jêxu.

⁵ Chuaq Jêxu doi ca wì: “Ô pì con, i jah ca ùh?”

Wì doi ca haq: “Ùh i jah ca cleq.”

⁶ Haq doi ca wì: “Pì ca'naih hlàm pah 'ma ca bong beq, pì jah ca.” Wì haq ca'naih hlàm, hi jah ca bàc mech ùh nui dùì dèh hlàm.

⁷ Mangai hõc tiaq ma Chuaq Jêxu loq waq ca haq, doi ca Pêtrô: “Aih Chuaq!” Jò Simôn Pêtrô bu tàng dèh bua doi, aih Chuaq, haq drah caxùnh eo, (ma jah 'màng aih haq khoi lèh eo), hi khoi hadrùc ta diac. ⁸ Wì mangai hõc tiaq ma 'noi q, chùng bong 'yoh mùt atiq taiq wì ùh i hangai ca 'bò toq leq, ùac jah 200 hagat. Wì dùì tiaq dèh hlàm bình ca. ⁹ Jò wì mangai hõc tiaq khoi tõi ta 'bò, wì hnoq ca piang enh 'nhèq ca ùnh. Hadai i 'benh mì.

¹⁰ Chuaq Jêxu doi ca wì: “'Ràng ca pì neo ranang jah ta cô.”

¹¹ Simôn Pêtrô tõi ta bong, dùì hlàm mùt ta 'bò, hlech ta hlàm 'bình ca càn, rèn jah 153 pliang. Ca bàc 'màng cô mahaq hlàm ùh hyah. ¹² Chuaq Jêxu doi ca wì: “Lam ta cô caq beq.” Mahaq ùh i ca mangai hõc tiaq leq hùa bòch

Haq: “Ìh cabô?” Wì ùh bòch, taiq wì khai loq aih Chuaq.
¹³ Chuaq Jêxu trùh haten ca wì, yôc 'benh wa ca am ca wì.
¹⁴ Cô yàng piq Chuaq Jêxu loh mahno dađeh am ca wì mangai hõc tiaq atìq ca Haq rìh hlài enh mangai cachìt.

Chuaq Jêxu Anoi Tàng ca Pêtrô

¹⁵ Jò wì khai caq gêh, Chuaq Jêxu doi ca Simôn Pêtrô: “Simôn, con Jon, ìh loq waq ca Au yi hnao ca wì cô ùh?”

Simôn doi ca Haq: “Òq. Chuaq ôi, ìh loq, au loq waq ca ìh.”

Chuaq Jêxu doi ca haq: “Ìh am dahwèq caq ca trùu con Au oq.”

¹⁶ Yàng baiq, Haq doi ca Simôn: “Simôn con Jon, ìh loq waq ca Au ùh?”

Simôn doi ca Haq: “Jòq Chuaq, ìh loq manoh au loq waq ca ìh.”

Chuaq Jêxu doi: “Ìh phai wèq ban 'bài trùu Au.”

¹⁷ Yàng piq, Haq doi ca Simôn hòm: “Simôn con Jon, manoh ìh loq waq ca Au ùh?”

Pêtrô loh ca mango jò haq tàng Chuaq bòch khai piq yàng: “Manoh ìh loq waq ca Au ùh?” Pêtrô doi ca Haq: “Waiq Chuaq, ìh loq dìq đõng rìm biác. Chuaq loq ca manoh au loq waq ca ìh.”

Chuaq Jêxu doi ca haq: “Ìh phai am dahwèq caq ca trùu Au. ¹⁸ Au doi ca ìh bàu joq 'nàng, jò ìh ỏi radam, ìh cật dèh caxi nìt, hi lam trong leq tiaq dèh manoh enh waq, mahaq jò ìh khai craq, ìh jah dèch tì, wa i wì ma 'noiç cật da ìh caxi nìt hi 'ràng ìh ti nòi ìh ùh enh lam.” ¹⁹ Chuaq doi bàu cô waq ca Pêtrô loq, haq jah cachìt 'màng leq, waq ca Boc Plình jah 'ngah 'ngai lem lình. Khai ca doi bàu cô, Chuaq doi ca Pêtrô: “Lam tiaq Au beq.”

²⁰ Pêtrô wìh hlài hnoq mangai hõc tiaq ma Chuaq Jêxu loq waq ca haq tiaq wa, aih mangai hõc tiaq ma khai

angèn ca Chuaq Jêxu jò wì caq Lè Lam Cwa, òiq bòch Haq: “Chuaq ôi, mangai ma blòq ìh cabô?” ²¹ Jò Pêtrô hnoq haq, Pêtrô bòch Chuaq Jêxu: “Mahaq Chuaq ôi, mangai cô èh 'màng leq?”

²² Chuaq Jêxu doi ca haq: “Tàng Au enh waq ca haq ôi rìh trùh jò Au hlài ta cô, bìac cô i troq cleq ca ìh? Phàn ìh lam tiaq Au beq.” ²³ 'Màng aih, i bàu oh daq doi, mangai hõc tiaq cô ùh cachìt, mahaq Chuaq Jêxu ùh doi haq ùh cachìt. Haq toq doi: “Tàng Au enh waq ca haq ôi rìh trùh jò Au hlài ta cô, bìac cô i troq cleq ca ìh?”

²⁴ Cla mangai hõc tiaq cô raq ma anoi hlài òiq ca bìac cô wa achìh ta sech cô; wa nhèn loq bìac ma haq khai achìh, aih bàu anoi joq 'nàng.

²⁵ Ôi i bìac ma 'noi q hòm Chuaq Jêxu ma khai broq, tàng achìh hlài tang bìac mòiq, au hèm òiq ca crõng taneh cô òiq ùh nui òiq ca sech ma jah achìh loh.

Sech Hadròih
Sech Hadròih

Copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo
All rights reserved.

2020-11-17

PDF generated using Haiola and XeLaTeX on 11 Feb 2021 from source files dated 10 Feb 2021

e5023a07-9831-5256-a315-1cae0f33043d